


KII WA KU KIBELO

 Ke jishuko ja kwikala pa tabbanako! Kyajinga kyakubula kuketekela kwi amiwa, ne apo. Amiwa, byo nayuka mba bufuku buno ke bufuku bwa kijilo, Amiwa kimye kyonse natemwa, inge Amiwa nji kuntu kumo, kyawama kwiya ku kijilo. Mambo ke... Naketekela mba bonse Benakilishitu bafwainwa kuketekela kuja kijilo, mambo Yesu waambile mba, “Inge wabula kuja, obewa kechi uji na lubaji ne Amiwa ne.” Onkao mambo, ke... kimye kyonse ke jishuko ja—ja kwiya ku tabbanako. Nanchi, bufuku buno, Mulongo Neville waji kwamba mba aye ujiko na jiji ja kuluka, kabiji—kabiji mba wafwainwa kutemwa inge Nakonsha kwamba ku kipwilo kyetu. Naji ku mubuula namba Nafwainwa kwikala walusekelo kuuba kyokyo. Nakonsha kutemwa kubijika ne apo inge. . .

² Keesha bufuku ke pwijilo ya banabalume, baketekelwa, keesha bufuku, kabiji ne basulu muno ba kipwilo, na mambo ambung’eneno yabo ya kimye kyonse ya pa juba ja Pakimo bufuku ne yaabo... kwikala na mulanguloko wakufukula na wakushimika. Naketekela mba anweba bonse mwayuka mba byetu—byetu—byetu bipepala byapichile, kabiji tusakushimika kipwilo. Kabiji nanchi byapita, kabiji kape twafwainwa kutatula uno mulungu. Kipwilo kisakutatula uno mulungu, nobe byo Nayuka. Kabiji betukanyijile pa bibye, muno mu Jeffersonville. Bino twaile ku Indianapolis, kibuji, kabiji betupele nsambu, nanchi tusakwikishimika. Kabiji nanchi kikatatula, kapepo, uno mulungu. Kikayukanyikwa panyuma ya kupwila keesha bufuku. Kabiji pa kupwisha kupwila kwa keesha bufuku, inge kechi bakatatula uno mulungu ne, inge kintu kimo kyamweka, ushimika kechi wakonsha kutatula uno mulungu ne, nishi aye ukatatula mulungu walondelapo.

³ Kabiji awe mulungu ubena kwiya, bufuku pa Kibelushi, pa Mulungu lukeelo ne Pamulungu bufuku, mulungu ubena kwiya, awe mulungu ubena kwiya pa Kibelushi ne Pamulungu, inge Nkambo waswa, Mbeni kukeba kwikala na—na—na pwijilo isatu, ne jikwabo, nobe byo twaubile milungu icheche yapatapo. Kabiji pano panyuma atweba... Apo pakekala pa Kibelushi bufuku, kabiji ne Pamulungu lukeelo, kabiji apa ne Pamulungu bufuku. Awe walondelapo, ao ukekala pa satiini ne pa fotiini wa uno ng’ondo.

⁴ Kabiji bamo balongo ne Amiwa tukafumapo panyuma ya kyokya kimye, kuya ku Colorado, palwendo lwa kwipaya nyama, kabiji ne kubwela. Inge tabbanako, byo ikapwa, inge kyaikala kyaswa muchima wa Nkambo, Nasaka kutola, kapepo, mulungu wapwijijika kasa Kyangye kufumapo kuya mu mbung’eno, kabiji ne kwikala na *Atwa Tutetesho Tutanu* na tubiji twa

Lumwekesho. Kasa tukyangye...Nobe byo twajinga na *Aa Mankulo Atanu na abiji a Bipwilo*, pano *Atwa Tutetesho Tutanu na tubiji twalondela Kyokyo*.

⁵ Kabiji kapepo mu milungu ibiji nangwa isatu yalondelapo, mambo Nalanguluka abo bamba mba, na banabalume bo baji nabo bakekishimika, bakonsha, twakonsha kushimika tabbanako kabiji ne kwikala nakyo mu moba teeni, nangwa fifitiini, kintu kiji byobya. Nanchi tukekala na mpuzha yabaya mwakwikala pepi nobe mabumba abiji a bantu baji muno, nangwa bimye bisatu, kapepo bantu bavula. Kabiji amo imo mo Napembejilenga poso kyokya kimye kyafika.

⁶ Mambo, Kibelushi kyapita ne Pamulungu, kyajinga kyakila kuwama, mwayukatu. Bantu baimeneta pangye kuno na kimye kya tuu koloko mabaanga, pakuuba mba bayuzhe tabbanako, kipwilo kasa kikyangye kushiikulwa ne. Lukeelo lwalondejilepo, pa faivi koloko, masanse wikala pa nzubo yalondelapo, waishilenga kufuma konkakwa, waambile mba, “Kwajinga bantu bayula kuzhokoloka tabbanako yense pa faivi koloko mu lukeelokelo.” Nanchi, nanchi bantu, byo batwelele mukachi, kechi pajinga mpuzha ne, kabiji bebwelelemo ne kuya byo bayile. Kabiji—kabiji aba baimene, bayujile kwikalatu mwakupichila, bajingatu balumbama pamo, ne bintu byonse. Kabiji Namona banabakazhi kasa baimana byobya, kasa basulwila, mwayukatu, byobya, kabiji ne masulwila akukulukilenga pa mibiji yabo. Kabiji mwanamulume umo wamupele kyanji, mwanamukazhi umo kipona; kabiji aye wabwela waimana poso ne mikupa yanji ke ikole, kabiji muntu umo wamupa. Mwayukatu, byonkabya, kabiji kintata bingi, ne bamaama baji na banyike bakolwa ne bintu bikwabotu, akya kyatama.

⁷ Nanchi, tubena kukeba kufumyako kyokyo ponka pakushimika tabbanako wabaya. Kabiji tukekala na kifulo kyawama apo baana, kimye kimo...kabiji ne kulubakanya, nobe baana babacheche babena kujila; kyawama, tukekala na kibamba kya kubilamo byobyoy, pakuuba mba bamaama bakonsha kutwelamo, bino kasa bamona kupwila byo kubena kwenda, kabiji kasa bomvwa monka mukachi ya kibamba. Kabiji ne kwikala na bibamba bya sukuulu wa Pamulungu ne bintu byonse biji mundonda monka mwafwainwa kwikela bintu. Kabiji akyo, inge Nkambo waswa, kikobiwa, mu yuwe mulungu ubena kwiya.

⁸ Anweba bonse mwaswishishe pa kyokyo, nanchi twakwachijilatu ku kyokyo, mwamona. Kipwilo kyaikala kiyimena bunke bwakyo. Byonka byaamba kipwilo, byo byonka. Matulasiti nangwa uji yense...Matulasiti bajitu, umo umo, voti umo. Kafunga ujitu voti umo. Ke kipwilo, akyo kiji—kiji mwayila kebelo ya kipwilo, mwayila kebelo ya kipwilo. Kipwilo, kyapamo, kyo kyamba. Byo byonka. Kabiji twatemwa kyokyo, mambo kechi tujipo na bishopo nangwa butangi bwapeulu

nangwa bakulupe ne bintu bikwabo bakwitubuula *kikye, kyokya*, nangwa *kikwabotu*. Ke Mupashi Wazhila mu kipwilo, ye wamba. Natemwa boobo butangi, kabiji kintu byawama.

9 Kabiji Naipwizhe, “Bushe anweba bonse mwakeba kupembelela twaya mu tabbanako ne kushimika kipwilo kyabaya?” Akyo kyajinga bbondi wa matulasiti, kechi kyaswishiwetu ku matulasiti ne. Kabiji bangipwizhe ami, nobe mukulumpe wa pa byonse, amba ngiye na kwipuzha kipwilo. Nanchi Naambile mba, “Pano yuji na mali avula akubaishako bukata bwa kipwilo ne kwikilenga mwapusanako, ne bintu byonse, kukila byo twajinga nabyo.” Naambile mba, “Pano twakonsha kuuba kyokyo ponkapano, nangwa twasunga mali etu poso twaikala na avula akushimika kipwilo kyapwijijika, kyakatataka, pantutu pangi.”

10 Kabiji twavotele pa kyokyo mu kipwilo, kabiji bonse bavotejiile kuuba mba “tushimike kipwilo ponka pano, kabiji twashimika kipwilo kyabaya pano ponka.” Kabiji twaikalatu bulongo na kyokya.

11 Kabiji kije kuno mu Jeffersonville betukanyinye, baambile mba atweba kechi twakonsha kwikyuba ne. Kabiji twapichile pa kyokyo, ne kuya ku Indianapolis ne kutwezhamo Kibuji na kikye. Kabiji ne abo babwezhezhe mukumbu, mba, “twajijilaitu,” tuji na sambu ya kwikishimika. Nanchi pano muzhi kechi ujipo na kyakuuba nakyo ne, ke Kibuji kyo kyafwainwa kwikyuba. Nanchi pano tuji na sambu, kabiji sendwe wa makotalaki uji na—na kipepala kya kuswisha ponka pano, kabiji Naketekela mba benengezha kutapa pa kimye kiji kyonse.

12 Abwe bufuku bwa keesha, inge aye—inge aye sendwe wa makotalaki waamba mba ubena kukeba kutatula mulungu ubena kwiya, nanchi Amiwa kakilukatu mbung’eno iji pa . . . , poso twaiya mu *Tutetesho Tutanu na Tubiji*. Kabiji inge sendwe wa makotalaki wabula kutatula mulungu ubena kwiya ne, nanchi jalondelapo ja Pamulungu, Pakibelushi ne Pamulungu, Amiwa kekala na mbung’eno kasa kyangye kuya ne.

13 Kabiji Nafwajilwe kwikala nayo Pamulungu, kabiji pano natana kuuba mba bufuku buno ke bufuku bwa kijilo, nanchi Nelutolokele pa jino ja Pamulungu. Mambo, jibumba jabaya, kuuba mwaja kijilo kasa mwaikala bulongo ne, kabiji umvwe twaikala na kipwilo kyabaya twakonsha.

14 Pano, tuji na Ndamakyaalo ubena kwiya. Aye . . . oo, mwayukatu mo Nekitazha, kechi papita kimye kyabaya po kyapainwe ku kisemi kyakwa Hickerson. Kabiji nyenga yetu umvumya piyano, eye etupepo ka nkondi kacheche pa piyano, ka “Baletai Mukachi,” inge mwakonsha, nangwa lwimbo umo mucheche wa yewa musango. Awe wawama mwanamulume mucheche wa mu kisemi kyakwa Hickerson,

akyo kyapembelelwa pa kimye kyabaya bingi. Ke mulunda wawama bingi wachepa mubiji, kabiji kine ke kya buneme ku bena Hickerson. Kabiji abo bonse ke babuneme kwi atweba, twibatemwa kabiji kine ke mulongo wetu ne nyenga. Atweba twasata pa kwikala na yuwe mucheche wasemwa mu kisemi kyabo, akyo kine kyangulula kisemi. Kabiji inge abo, bashanji ne bainanji ba mulete yuwe mulunda mucheche azhijikwe. Pano, Kinembelo kyaamba mba, “Baletele kwi Aye baana, ba bacheche, amba Aye wakonsha kubika kuboko Kwanji pe abo ne kwibapesha.”

¹⁵ Pano, muji bantu muntanda baketekela mu kyobatela mba “lubatizhilo lwa bwanyike.” Kabiji, ko kuuba mba, abo basenda babo balongo babacheche kechi kwibabatizha mumeema nangwa pachechetu ne, mambo, bebasansatu meema. Pano, kechi twatanapo kuji konse mu Baibolo ne, apo po basashile muntu uji yense ne, bakulumpe, nangwatu baana babacheche ne.

¹⁶ Kabiji nanchi lubatizhilo ke lushimuno lwa kwamba mba mwingilo wa bupe bwa mukachi wa ubiwa. Kabiji baana babacheche kechi baji na maana akuyuka bubi ne. Onkao mambo, Yesu byo afwile pa musalabo, Aye wafwile na kufumya bubi bwa muntanda. Kabiji umvwe mwaana waikala ke muntu, kabiji wasemwa panopantanda, abo kechi baji na bubi bwabo abo beene ne, onkao mambo kechi bajipo na lulapilo lwafwainwa kubiwa ne. Bino, umvwe aa, Mashi akwa Yesu Kilishitu afumyapo abwa bubi. Mambo, mwaana wasemwa mu bubi, waimichijilwe mu bubi, wiya pantanda na kwamba bubela, kabiji abo ke bandengamambo monka mwaila kisemwa, pakuuba Mashi akwa Yesu Kilishitu amfuta mambo a kyokyo. Pakuuba umvwe mwaana wafika pa myaka ya kuyuka bintu, kabiji wayuka byawama ne byatama, apo ipo po afwainwa kulapila kubyooby byo auba. Ke bubi pano ke bubi byonka biji bubi bo asemenwamo, ke bubi bwa bumuntu, bubi pano ke bubi abwa Adama ne Eva bo baubile; kabiji abo bwajinga bwalekelwa kwi Lesa, na Mashi akwa Yesu Kilishitu. Pano mwaana kechi uji na bubi bwa kulapila ne kanatu wauba bubi, nanchi ipo po afwainwa kulapila. Mwamona? Kabiji umvwe walapila, nishi kyo kimye kya kubatizhiwa, kabiji pano aye ubatizhiwa mu kwibizha mu meema.

¹⁷ Poso kyokya kimye, tulondelatu mikambizho ya Baibolo, ayo, “Yo bamuletejile Yesu baana babacheche, amba Aye abikepo maboko Anji pe abo ne kwibapesha.” Awe semi wawama bufuku buno waleta yuwe mwaana mucheche kwi ba kafunga ne Amiwa, na kuzhijikwa. Kabiji babena kumvwa lutundaiko lwakumubika mu maboko akwa Kilishitu, babena kumubika mu maboko akwa Kilishitu. Nanchi, konka ku lwitabilo, twapana mwaana kwi Lesa, mu kupana lusachilo lwa kumuleta kuno, ne kwipuzha Lesa amba amupeshe, kyo tutela mba “kupana baana

babacheche.”

¹⁸ Pano, mwayuka byo Nafwainwa kwikala pa baana bami. Amiwa njina nsongwakazhi mucheche mu Lukumo bufuku buno, kabiji wapainwe kwi Nkambo, kuno ku kitapisho. Amiwa njina nsongwalume mucheche ne nsongwakazhi baikala kunyuma kokwa, bufuku buno, abo bakyangye kubatizhiwa ne. Wanu, leveni, Amiwa najikwambanga nanji pa kikye leelo, Sala, bya lubatizhilo. Kabiji Joseph ujitu sebeni, nanchi aye ukijitu mwanjike ku kikye, poso kufika. . . Inge wafwainwa kwi kikeba, ne kwamba mba Lesa ubena kwikibika mu muchima wanjiki, Nakonsha kwikyuba pa kyokya kimye. Pakuuba, baana babacheche, Amiwa nebapanatu kwi Nkambo, mambo mo mwafunjishisha Kinwmbelo.

¹⁹ Mulongo Neville, inge wakonsha kwenda pamo ne amiwa kuya ku yuwe nsongwalume wawama. Amiwa najinga na moyo. . . Bushe ao ye Hollin? Hollin? Ee, Hollin, Junya. Sepetena Hollin. Kyawama, akyo kiji bulongo. Oo, Nalanguluka mba walala. Ao ye musango wabena Hickerson, kiji kyonse kibena kubiwa. Namumwene juba jikwabo, Naambile mba “ye Ndamakyaalo,” ne bikwabotu. Kabiji, mambo, akyo kyajinga kyakepesha kwi aye, monai, kumutongola aye amba “Ndamakyaalo.” Muji byepi? Kyawama, nayuka mba akyo kyafwainwa kwikala bunoshi kwi yense maama wa bulesa. Bushe kechi mwafwainwa kulanguluka byobo nenyi? Wawama bingi. Kabiji pano, Mulongo Hickerson ne Nyenga Hickerson, nobe kalume wakwa Kilishitu, nobe kafunga wenu, Napana yuwe mwaana, konka ku lwitabilo, mu maboko akwa Yesu Kilishitu, mwi Aye mo mubena kukeba ku mubika mu maboko Anji.

²⁰ Twayai tukunyike mitwe yetu nobe kafunga kabiji Neamiwa twaimana pano na maboko etu pa mwaana.

²¹ Taata Wetu wa Mwiulu, mu Baibolo baletele kwi Anweba baana babacheche, amba Anweba muteteke maboko Enu pe abo kabiji ne kwibapesha. Kabiji kyakine, Nkambo, bajinga bapeshiwa. Kabiji pano pa kulondela kyakumwenako Kyenu, bintu byo Mwaubile, twaeseka pepi pepi, Nkambo, kutanga Baibolo kabiji ne kulondela kyakumwenako nobe byonka Anweba byo mwaubile. Kabiji awe taata ne maama, Mulongo ne Nyenga Hickerson, banababwanga betu baji muno mu tabbanako, batuletela atweba alwe lusekelo lucheche alo Anweba lo mwabika mu bukalama bwabo. Lwafuma kwi Anweba, Nkambo. Anweba mwi bapele yuwe mwaana. Kabiji pano babena kukeba kupana bumi bwaji kwi Anweba, pakuuba mba ekale wa mwingilo kwi Anweba. Nalomba mba Anweba mpeshai yuwe mwaana, amba Anweba musakumupa bumi bwalepa. Lekai ekale, inge kyakonsheka, akamone Kwiya kwa Nkambo. Nalomba mba Anweba mukamupesha konse ko akekala. Lekai akakomene mu nzubo ya Bwinakilishitu, nobe

byonka byo asemekwa mu imo. Kabiji lekai kitwajijile mu ino nzubo. Lekai bataata ne bamaama bekale na bumi pakuuba mba bakamumone mwaana mu pulupiti, inge kya konsheka, na kusapwila Mamboawama. Abo balekai bakekimone muyekawo musango, Taata, kukila pa—pa jitanda ja Nzubo Itoka, nangwa kuji konse, mambo ke bakalume Benu, bakeba mba bumi bwa mwaana bwikale bwazhijikwa ne kupanwa ku mwingilo wa Lesa.

²² Pano Nalomba, Taata, namba Anweba mu mupeshe mwaana. Kabiji lekai lusa lwa Lesa lufike peaye, kabiji lekai ekale wa bututulu kabiji ne lusekelo mu bumi bwanji bonse. Kabiji lekai bashanji ne bainanji bekale na bumi bakamumone wakoma, twaipuzha ne jikwabo. Mupeshai byo tubena kumupesha mu Jizhina Jenu.

²³ Kabiji pano, mucheche Sepetena Hollin Hickerson, Nakupana kwi Yesu Kilishitu, amba mapesho o twaipuzha eye ekale pe obewa. Ikala wa bumi bututulu ne kukosa, mulongo wami mucheche, kabiji ukekale wa kutota Lesa. Mu Jizhina ja Yesu Kilishitu twikipuzha. Amena.

Lesa emupeshe. Lesa emupeshe anweba bonse. Mwaana wawama bingi.

Ako kotukabula kukota ne, kechi tukakota ne,
Mu Ntanda amo motukabula kukota ne;
Kechi tukakota ne, kechi tukakota ne,
Mu Ntanda amo motukabula kukota ne.

²⁴ Kechi kikekala kyawama nenyi? Abo banyike bakekala bakulumpe, kabiji bakote bakekala banyike. Pano, akyo kechi kyawama nenyi? Kabiji kechi tukakolwa ne, nangwa kwikala na bulanda ne, nangwa kufwa ne.

²⁵ Pano, mpwijilo, Mulongo Neville wabijika. Amiwa mbena kukeba kubijika pano, ne apo, ayo mbung'eno, kwikilubako ne, kabiji ne mbung'eno yo baambapo. Kabiji, ne ba Mrs. Ford abo baiyanga ku kipwilo myaka yapita kunyuma, Namutwajiletu ku mwananji wamukazhi, papitatu moba acheche, kabiji uji na myaka eite, kabiji wayile na kukumanya Nkambo bufuku bwapita pa eiti koloko, Nalanguluka. Kabiji mbung'eno yanji, bakafunga ne Amiwa tukekela nayo pa kipwilo kya pa Coots' Pakisatu, pa teni—teeni—sate, Pakisatu kibena kwiya. Mrs. Ford, Mrs. . . . Naketekela Nalubamo janji jepi. . . Levi, Mrs. Levi Ford. Wetu. . . Abo—abo bo bainanji ba Lloyd Ford ye mumona mu buuku wami, amba ukasungila awa suti wa ba Boy Scout, kabiji Amiwa njitu na mukupa umo washalapo. Pano, aba—aba bo bainanji nsongwalume. Nanchi Namusendele juba jikwabo na kulomba nanji, awa mukote kamulanda. Kabiji waile na kukumanya Nkambo Yesu.

²⁶ Pano, inge Nkambo waswa, Najinga na kintu kimo papo kyo Nakonsha kubijikilako aya mpwijilo, inge yaiya mulungu ubena

kwiya, inge Neibika mumwe, nangwa byonkabyo Nalangulukile mba Nkyubile, pa kyookya kyo Nafwainwa kwambapo pa—pa—pa ibena kwiya, aaye mpwijilo ibena kwiya mulungu wiya. Inge Na—Nalanguluka...Nalangulukile mba Nekibika mu yuwe buuku, Amiwa kechi nayuka ne kana Naubile byobyo nangwa ine. Ee, kiji pano. Aye Nkambo inge waswa, Kibelushi bufuku Nasaka kusapwila pa mutwe wa *Kika Muntu Umo kyo Ongwela Bumi bwa Mukwabo*. Kabiji Pamulungu lukeelo Nakeba kusapwila pa *Kubikwapo Kitungutungu Kya Pilamenda*. Kabiji Pamulungu bufuku Nakeba kusapwila pa *Tangi Wami*, mutwe, *Tangi Wami*, bufuku Pamulungu wiya. Pano lekai Nkambo apeshe bintu bibena kwiya kabiji ne kukwansha ami, byonka byo Nafuminepo, kabiji ke kibaaba kicheche kya kutapilapo.

²⁷ Pano bufuku buno, twasaka kupelawizha ne kwikalapo na bintu bicheche. Mwayila bintu, Amiwa njina kalata kuno ayo—ayo yafikatu mu makalata, Billy byo atoola mu kakimye kachechetu kapita, amba balongo bamo baji ku Michigan, kabiji ino yafuma ku kipamo kya basapwishi baji na bintu byavula bingi. Abyo byo bilengela bintu byavula kulubakana, mwamona. Amba, kuji balongo bamo kokwa babena kwamba mba Amiwa yami nebatuma, abo babena kusapwila mba banabalume bafwainwa kuleka bakazhi baabo ne kukeba kwasho wabo wa bumupashi, kabiji—kabiji amba Amiwa kyakine ne ubula kutamisha. Amba kafwako kijipo...Kabiji, oo, bintu bimo byakila muktama byo mwaumvwapo. Kabiji kipamo kya basapwishi byo bekyumvwine, kabiji babena nkunembela kalata pa kikye, kabiji amba Amiwa yami nebatumine kuya kokwa kabiji kyaleta bingi kivundakanya. Kabiji bamo babena kwaula ne kwamba mba mwanamulume wafwainwa kusha *yuwe* mukazhi ne kuya na kusongola *yewa* mukwabo. Bino, kino kipwilo kyayuka mba atweba kechi twimenako bintu byaluwankana musango yewo ne.

²⁸ Twaketekela mu Baibolo. Twaketekela mba umvwe mwanamulume wasongola mwanamukazhi, awa ye mukazhi wanj, kabiji kwabana kanatu lufu. Akyo kyaubatu. Atweba kechi twaketekela byobyo bintu ne. Atweba kechi twaketekela mu butemwe bwakasulukila uji yense ne, nangwa byonkabyo. Atweba kechi twaketekela mu byobyo bintu ne. Atweba kine twaketekela Baibolo, kabiji Yenka ayetu. Nanchi Amiwa nsakwikopatu, kikope kyayiye kalata, ne kupana mukumbu wami kabiji ne kwibika mu magazini, kabiji akyo—akyo kikalamawizha kyokyo. Naketekela byo kyafwainwa, nangwa byonkabyo, kupana mukumbu kwi abo.

²⁹ Pano bufuku buno, kasa tukyangye kushikula Kinembelo, twayai twambe kwi Nkambo yetu.

³⁰ Taata Wetu Wamwiulu, tubena kufwenya ku Jitanda Jenu ja lusa, mu Jizhina ja Nkambo Yesu, Awa mukatampe Umo Ao

wafumine mu Lukumo mu kwitusolwela atweba bunoshi bwa Lesa. Byo twimusachila Anweba pa yuwe Yesu mukatampe Ao wajinga kusololwa kwa Lesa, kwalengwa patoka kwi atweba, kabiji kupichila mwi Aye mo muji bukuzhi bwa kufuma ku bubi bwetu. Kabiji pano twapitaila kufuma kulufu kuya ku Bumi, mambo Tumuketekela Aye. Mambo kyamunembelwa Aye, amba Aye waambile mba, “Aye umvwa Byambo Byami ne kumwitabila Aye watuma Ami, uji na Bumi bwa myaka; kabiji kechi ukeya muginje ne, pakuuba wapitaila kufuma kulufu kuya ku Bumi.”

³¹ Peshai Byambo Byenu, bufuku buno, Nkambo. Kabiji tuji kuno na kuja kijilo pa kimye kichechetu. Benakilishitu, balunda netu bangikazhi ba mu Bufumu tukapwila kuzhokoloka bitapisho, kabiji kokwa tukaja kyotutela mba “kijilo,” ki—kibese kicheche kya—kya byazhila akyo Anweba kyo mwitunshila, mu kumweshwa mba twaketekela mba Anweba mwafwijile bubi bwetu, kabiji ne kusanguka jibiji pa juba ja busatu, kabiji ne kwikala mumi myaka ne myaka, kabiji ne kuuba kikye poso Anweba mwabwela, monka mwaila Binembelo nobe byonka byo twakambizhiwa. Zhijikai michima yetu kufuma ku milanguluko ya bubi ne byonse byo twauba byapusanako na kyaswa muchima Wenu kikatampe. Taata, tulekelaiko mambo, kabiji mwitupe lusa Lwenu bufuku buno. Tutebawilai Shinkwa wa Bumi, mu Kyambo, byo tubena Kwikitanga ne kwamba pe Akyo. Mu Jizhina ja Nkambo Yesu, twikipuzha. Amena.

³² Pano mu Buuku wa Lumwekesho, kutatwila pa veeleshi umo, Nasaka kutanga veeleshi wabu 20, nangwa veeleshi wabu 1 wa kyapitala kyabu 20.

*Kabiji Namwene malaika kasa ekila kufuma mwiulu,
kasa aji na bakii ba kalunga kabula kupela ne
munyololo mukatampe mu kuboko kwanji.*

³³ Pano Nasaka kwamba, inge kyakonsha kubiwa, inge Nakonsha kwikitela mba mutwe kufuma mu kikye, nangwa kufumya kishina ku kino kibaba, pa mamineti alondelapo tweti nangwa tweti-faivi, Nakonsha kutemwa kwikitela mba, *Kii Wa Ku Kibelo*. Pano, Amiwa kechi nakeba kwi—kwi kyaamba mba “bakii,” ne mambo Peteleo wapewe “bakii ba mu Bufumu.” Bino Mbena kukeba kwikitela mba: *Kii Wa Ku Kibelo*. Kabiji ponkapotu panyuma ya kikye, Nasaka kupana byambo bicheche pa kijilo, kasa tukyanye kwikitambula bufuku buno.

³⁴ Pano, kii. Namona papo byo tubena kutanga, amba awe Malaika waishile kufuma Mwiulu, kasa aji na kii mu kuboko kwanji. Naketekela mba ke Lumwekesho 13 nangwa 19, twatana jibiji, Malaika mukwabo kasa abena kwiya na kii. Kabiji kii ke, mwingilo wa kii, ke kunshikula kintu kimo, kintu kimo kyajinga kyashikiwa, nangwa ke kintu kimo kyafwainwa kushikiwa. Bino kii wapewa kwingila yeo mwingilo.

35 Pano, kuji misango yavula ya bakii, mambo tuji nyingijisho yavula ya bakii. Kuji bakii ba ku mashitolo. Kuji kii wa ku nzubo yenu, kuji kii wa ku motoka wenu. Kabiji twi atela mba bakii, kabiji bakii. Kabiji awa kii bafwinwa kumuvuzha, bimye byavula. Nangwa ku nzubo, kimye kimo bafwainwa kumulenga, kyo tutela mba, kii wa makii avula. Mu byambo bikwabo, ke kii walengwa na bipabi, wingijilapo, ao—ao uzhingulusha loko mu musango umo kabiji ufika ne pepi kushikula kibelo kiji kyonse, watelwa mba “kii wa makii avula.” Ke kipabi kya makii avula, kabiji afwainwa kushikula muye musango, na manzubo etu nangwa ku myotoka yetu, bafwainwa kwi avuzha. Kabiji pano kuji . . .

36 Kii uji yense kechi wakonsha kushikula kibelo kiji kyonse ne kana poso baingijisha kuboko. Pafwainwa kwikalako kintu kimo kya kwingijisha kii. Kii aye mwine kuuba wiingijisha aye mwine ne. Kwafwainwa kwikalapo kintu kimo kya kutola kii.

37 Kijitu pamo nobe maikolofoni ye Mbena—ye Mbena kwambilamo. Awa maikolofoni kechi wamba ne. Kanatu pajipo kintu kimo kya aambilamo, kechi kyakonsha kwamba bunke bwakyo ne. Kyafwainwa kwikala kintu kimo kya aambilamo. Nanchi, kechi ke maikolofoni ne, ke jiji nangwa akya—akya kyongo (kunyuma) akyo maikolofoni kyo asenda kutwala mu—mu lubesha, kwiya ku kutwi nkobe.

38 Pano, abyoyobyoyo kiji pa kusapwila Mamboawama. Kechi atweba bene ne, nobe bamwingilo, atweba kechi twi Mamboawama ne. Pakuuba atweba twibingijisho bitwala Jiji ja Lesa kupita mu kwingila kwentu, kwa bantu, kuya ku uteleka.

39 Kimwesho kijitu pamo. Amiwa kechi nayukapo kintu kya kwamba ku kipwilo pa kino kimye na mwaila kimwesho ne. Bino umvwe Mupashi Wazhila wafwainwa kumwesho, patanshi, amiwa ke kimwesho, apa bino Nalondolola kyokya kimwesho ku ye batuminakyo. Nanchi kechi kyajinga kyami ne, ami, kimwesho kechi kyajinga amiwa ne, Amiwa. Kyajinga Lesa wapaine kimwesho, kabiji Naubile nobe tulasimita, mu kuleta mbila ya kimwesho ku bantu.

40 Pano, kii ujitu pamo. Ndekelaiko mambo. Kii ukwatwatu mukuboko akwa kushikula kibelo. Monai, kyafwainwa kwikala kuboko. Pano, mu kii Ye mbena kwambapo bufuku buno, ke kubokotu kumo kwakonsha kukwata awe kii, kabiji ako ke kuboko kwa lwitabilo. Kyo kyonka kintu kyakonsha—kyokonsha kukwata awe kii. Kabiji maboko akwata makii akwabo, kabiji kisendatu kuboko kwa lwitabilo pakuuba kyokyo.

41 Pano, tusenda kii nobe ku maana. Pano, muntu wafwainwa kuuba, inge ubena kukeba kuvuzha maana, monai, pano, kuji kii ku kyokyo. Kuji jishinda awe muntu jo akonsha kushinkulwa. Aye wafwainwa kwikala . . .kutambula mabuuku anji ne kufunda kwanji, kabiji kechi wakonsha ne . . .kafwako nangwa

umo wakonsha kumufunjisha ne. Bakonsha kumufunjisha, bino aye wafwainwa kufunda. Kabiji jishindatu jakubilamo, wafwainwa kukwata bakii, muji kintu kimo momo kisolola nangwa ku- . . . kubula kumusolwela maana oo abena kukeba.

⁴² Kabiji kuji bantu bakonsha kweseka kukaya piyano, ne abo . . . nangwa kwimba. Abo kechi bayukatu mwakwikyubila ne, bino bakonsha kuya konka kabiji ne bafunjishi bakonsha kufunjisha pakimye pakimye, kabiji abo kechi bakonsha kufunda ne. Abo kechi bakonsha kukwachijila awa kii uji na kyafyamika ne, ayo ng'umvino ne kyongo kya kwaluluka ne bitutu bikwabo kasa bimba. Kisendatu kii.

⁴³ Kabiji samushi, kuji kii ku samushi, pakuuba mba mwaikala bakwachijila ku kyokyo. Namonapo banabalume bakonsha kusenda mikuku ina ya manambala, kabiji ne kubika minwe yabo, kila munwe umo wabikwa mu mulaini wa manambala, kabiji kyaiya kufika panshi *byobya* kapepo manambala faivi nangwa sikisi azhika, ne kubika mukumbu panshi. Kubika manambala a milaini foolo pa kimye kimo, kufuma pa wanu kufika pa naini. Kyawama, Najinga na kimye kyakonsa pakuuba mba mbelenge mulaini umo, poso Naikala na minwe yavula ne mana akubelenga, pa—pakuuba mba ngikale na mulaini umo wa manambala. Amiwa kechi natana yewa kii ne. Bino, mwamona, bamo bekalatu na kii umo wakyokyo, abo bayuka mwakwikyubila.

⁴⁴ Kabiji kuji kii ku maana, muntu wakeba maana. Kuji kii ku sayaasi, basendwe bampeselo ya masayaasi. Pano, kuji, awa ke kii mukatampe bingi. Bantu bakeba yewa kii.

⁴⁵ Nobe kuno kimye kimo kunyuma bataine kaatomu, kabiji bayukile mba kwajinga ma atomu, kabiji pano ma atomu alengele mamolekyu ne bikwabotu. Pano, batatula kupesapesa, muntu umo waketekejile mba inge awa atomu wakwachila bintu byonse pamo, inge awa atomu waalulwa, akyo kyakonsha kutola kyokya kyo bakwata ne kwikyabanyapo. Mambo, bintu byonse byakwata ku atomu, twayuka kyokyo. Pano, akyo kifulo kyakwatakana na ma atomu. Anweba mwakwachijilwa pamo na ma atomu. Nsono, bichi, byonse byakwata pamo na ma atomu. Kyawama, inge awa atomu, waalulukila lubaji lumo, inge kyakonsha kulajika ne kwalulwa, nanchi kyafwainwa konauna. Kabiji, pano, ma sayaatisiti baketekela mba akyo kyakonsha kubiwa, kabiji baingila baingila, kabiji bekala awala pa awala, mulungu pa mulungu, mwaka pa mwaka, poso kyapelako bekishinda.

⁴⁶ Kyajinga, Naketekela, Thomas Edison, pa kyeya, po baamba mba muntu uji na maana a kulenga kyeya kya malaiti. Aye ye walekengele kyeya kya bbambu. Kabiji aye kechi wailenga pa mwanya bufuku ne. Aye wakonsheshe kutola kashinkwa mu kuboko kwanji ne kuja kajo kanji, kabiji wabwela

waikala byobya na kwingila. Kutu kumo kunyuma kwine mu milanguluko yanji, kintu kimo kyamubuujiile mba wakonsha kwikyuba. Kyo kika? Ke kii wakonsha kushikula jishinda.

⁴⁷ Kechi kepita myaka yavula ne, kwajinga—kwajinga muntu umo waketekejiile mba wajinga na kya bupe kya kunemba bisela byakusekesha. Aye waketekejiile mba uji na kii mu kuboko kwanji. Kabiji aye wakebelenga...aye waile...Aye waikalanga mu Kansas. Aye waile nakubijika mu kipepala kikatampe mu Kansas City, ne kusenda byanembwa byanji. Kabiji wakubijika mba, “Mwane, obewa kechi uji nakyō ne. Obewa, kechi kikebwa ne kweseka ne, obewa—obewa kechi wakonsha kwikyuba ne.” Bino akyo kechi kya mupele mutende ne. Aye wayukile mba uji nakyō. Kabiji wabwelele jibiji kunyuma, na kweseka, bino aye (wakupitulukamo) wamukaijiile. Pakupezhako, wayile ku mampuzha akwabo, kabiji bamukaine, ne kwamba mba, “Anweba, kechi muji nakyō ne. Kuuba mwikyuba ne.” Bino nangwa byonkabyo aye waketekejiile mba ukekyuba. Kabiji ajo jo jishinda, aye ujipo na kintu kimo mu kuboko kwanji! Kyapelako, wamwene kinto ya kunemba masawakya acheche, Naketekela, kishinakata kya masawakya nangwa kintu kimo kya kipwilo, bintu bimo kiji nobe byakusekesha bya kipwilo. Kabiji aye winsonkejiile kacheche kabapuku- nangwa ngalaji wayulwa na-bapuku, amo bapuku mo banyemenenga kuzhokoloka ponsetu muyoya mpuzha ne bintu byonse, mu bipepala byanji, bino aye wamwene ngubilo imo yapusanako ya puku umo. Apo ipo patapijiile jishimikila ja Mickey Puku. Pano Walt Disney ke wa mamilyoni avula. Kika? Aye wajinga na kintu kimo mu kuboko kwanji, kabiji wayukile mba wi kikwachisha, wayukile mba wakonsha kwikyuba. Kabiji abyo kyonse kya kumwenamo byo kyubiwa. Inge banabalume ne banabakazhi baji na kintu kimo mu maboko abo, kyo bayuka mba bakonsha kwikyuba.

⁴⁸ Kimye kyaalo po kyakwachilwe na polyo. Nobe, atweba bonse twakambizhiwa pano kutambula ntombi, pakuuba mba kishindwe. Kimye polyo po afikile...Keesha Amiwa natekelenga ku dokotala byo Naendeshenga mu mukwakwa, dokotala umo kufuma ku Louisville. Aye waambile mba, “Myaka yapitapo icheche, mwalo mukatampe byo afikile mu Louisville,” waambile mba, “Inge banabalume baimene po Naimejiile, kabiji bamwene byakupemenamo fiifite-sebeni pa kimye kimo, banabakazhi, bansongwalume ne bansongwakazhi, bajinga nakalepu kakikola kya kitelwa mba ‘polyo,’ kabiji kechi kwajingapo kyakuba pakyokyo ne.” Waambile mba, “Amiwa kechi keba kumona kintu kiji byo byo jibiji ne.”

⁴⁹ Pakuuba sayaasi walangulukile mba, “Inge kujipo kintu kyatama nobe polyo, kine kujipo kintu kimo kyafwainwa kwikishinda.” Abo balwile, baimene pa mikwakwa na mabbuti, aba bantu bazhimya mujilo, bavujile bisochi,

kabiji basashijile, bakebele michi, baubile bintu byonse, kasa bakeba kii wakushikulako kibelo kyakuya ku bwanabwabene. Kabiji, kyapelako, mwanamulume umo Mwinakilishitu wa jizhina ja Salk watulukile ntombi. Kika? Kwajinga kintu kyatama kyaubiwenga, kwajinga kyubilo kyakwipayang'ana kyaubiwenga; kwajinga kii kuntu kumo awo washinkwile bwanabwabene jibiji ku muntu, kabiji ntombi ya kwa Salk yajinga muchi mukatmpe bingi. Oo, byakonsha kuuba kii! Ntombi yaletelwe, kabiji pano polyo ubena kushindwa na iye ntombi, mambo akya kwajinga “kyakubula kukoka kabiji kechi kwajinga kupelelwa ne,” awa kii wajinga kuntu kumo. Kwajinga kintu kimo kyafwaijilwe kwikishinda, kabiji bajinga baswikwa kwikikeba.

⁵⁰ Kabiji umvwe kujipo kyatama nobe biji polyo, bilonda peshingo, kabokoshi, mashika akibobo, kipwelonda, kikomena mubanga, kabiji ne bikwabotu, abyo sayaasi, abye byatama, wibilwisha, mute ne bufuku, poso batana kyakwibishindako, mambo ke bintu byatama, ke bitapang'ana, ibyepi pano kechi kuji kii wakupulukilamo muntu uji mu nzubo ya bubu? Kuji kii wakyokya kibelo, wakulubula bantu ku kyokya.

⁵¹ Kii, javula, inge waalula loko, kabiji, inge mwatana kii, kyafwainwa kwikala kintu kyabunoshi, kintu kimo kyafikilamo, inge ne kechi wakonsha ne kwikikomena ne. Inge kechi kyafikilamo kukomena ne, kyawama kwikilekatu. Pakuuba inge kyafikilamo kushikiwa! Nanchi kii javula ye—ye katajilo ku kintu kimo, nangwa jishinda ja kutwelelamo ku kintu kyafwainwa. Kii, kyokyo aikelako, pano, ukakomonona kintu kyafwainwa.

⁵² Pano twatanga mu Yoano Wazhila, kyapitala kyabu 10, Yesu waambile mba, “Amiwa ne Kibelo kya ku jitanga. Amiwa ne Kibelo,” kechi *ka* kibelo ne, “*akya* Kibelo, kyo kyonkatu Kibelo. Amiwa ne Jishinda, jo jonka Jishinda, Bukine, kabiji ne Bumi, kabiji kafwako muntu wiya kwi Bataata ne kanatu pe Amiwa. Amiwa ne Kibelo kya ku jitanga kabiji ne bonse batangijilepo palutwe Yami ke balwany, bakabwalala ne batupondo.” Aye ye Kibelo kya kujitanga. Aye ye Kibelo kya lupulukilo.

⁵³ “Kechi kujipo jizhina jikwabo jo bapaana mushi ya Mwiulu amo mo mwakonsha kupulukila ne, kanatu kupichila mu Jizhina ja Yesu Kilishitu.” Kafwako kipwilo ne, kafwako dinominesheni ne, kafwako mafunjisho a bantu ne, kafwako mafunjisho a kintu kikwabo ne; kanatu kupichila mu Jizhina ja Yesu. Awa ye—awa ye Kii. Kechi kyakukumya ne Petelo wakonsheshe kwingijisha umo pa Juba ja Pentekositi! Bakebelenga kuyuka mwakufikila mu kyokya Kibelo. Aye waingijishe ba Kii. Kabiji kujitu Kii umo, mambo kujitu Kibelo kimo. “Amiwa ne Kibelo.” Kabiji Petelo wajinga na Bakii Bakyo. Kabiji aye waambile mba, “Lapilai, anweba bonse, ne kubatizhiwa mu Jizhina ja Yesu Kilishitu

mululekelo lwa mambo enu, kabiji mukatambula bunoshi bwa Lesa.” Ke Kii wa ku Kibelo, kabiji Yesu ye Kibelo.

Kujitu Kibelo kimo kya lubuko, kabiji Yesu kyo kyokya Kibelo.

⁵⁴ Kujitu Kibelo kimo kya mutende. Ee. “Mutende wami Napana kwi anweba.” Kujitu Kibelo kimo kya mutende wakine. Mwakonsha kulanguluka mba uji na mutende. Anweba mwafwainwa kwikala na mali avula a kupota nzubo, mwafwainwa kwikala na mali avula akupotela byakuvwala baana benu, kwikala na kajo kakuja, bino wafwainwa kuvuzha buyuke bwa kuyukanyikwa mu bantu. Pakuuba umvwa wavula makwabilo obe bufuku ne kwinegezha kulala, kwikalatu Kintu Kimo kyakonsha kupana mutende. Kokuuba mba, inge wayuka mba ubena kufwa abwa bufuku, kujitu Mutende umo, kabiji, ko kuuba mba, Yesu ye Mutende. Aye ye Mutende wetu.

⁵⁵ Aye ye Lubuko lwetu. “Amiwa ne Yehoba Lesa wenu ubuka ku bikola byenu byonse.”

⁵⁶ Aye ye Kibelo kya Mwiulu. Kabiji kechi kujipo kibelo kikwabo nangwa jishinda jikwabo ne kanatu kupichila mwi Yesu Kilishitu. Aye ye Kibelo kya Mwiulu.

⁵⁷ Kabiji pano Yesu kyo Kibelo ku byonse bye bintu, kabiji lwitabilo ye kii ushikula Kibelo. Pano, inge Yesu ye Kibelo ku yonse ye milaye yakwa Lesa, lwitabilo mu mwingilo Wanji wapwa lushikula kibelo kiji kyonse kya bunoshi buji mu Bufumu bwa kwa Lesa. Mwikimona? Kii ye. . . Lwitabiloye kii ushikula mulaye uji yense Ye alaya. Kii wa lwitabilo ye uba byo byo, lwitabilo mu mwingilo Wanji wapwa. Ke aao makii o tubena kwambapo.

⁵⁸ Pano mu Bahebelu, kyapitala kyabu 11, Njina byavula bingi byanembwa papo, mambo a baabo babilobo ba lwitabilo. Wajinga kii, ku—ku Kibelo, wakainye byatunwa bya mabokwe. Wajinga kii, lwitabilo, washikwile manzubo atuleya. Kyajinga lwitabilo, kii wa lwitabilo, ye wazhiminye bukaji bwa mujilo, bapulukile ku ponko, basangwile bafu ke bomi jibiji. Kyajinga lwitabilo, kii wa lwitabilo mwi Lesa mumi. Akwa kuboko, awa mwanamulume, awa mwanamukazhi, wakonsha kutola awa kii wa lwitabilo, bakonsha kunshikula mulaye yense Lesa ye alaile. Pakuuba awa kii inge kechi uji nanji ne, obewa ubena kukayatu, kechi ukekinshikula ne. Obewa ukapumako, mambo awe kii. . .

⁵⁹ Uji yense kii walengwa bulongo uji na kipabi mukachi ka maloko, kabiji kisendatu musango umo, wandengelo ya makii pakuuba mba mwalule abya bipabi. Kabiji kipabitu kimo kicheche kyafuma mujishinda, kikalubakanya bintu byonse.

⁶⁰ Onkao mambo, Naketekela mu Mamboawama onse, Kyambo kyonse kya Lesa, akyo kikasulula bulume bwa Lesa, abo buleta mapesho Anji ku bantu. Ke kii ku Kibelo, ye Wikinshikula. Oo, aba babilobo bakatampe, aba bangauzhi ne banabalume

bakatampe ba mu Baibolo, aba bajinga na yewa kii! Ao oene mambo kyo bakaishe tunwa twa babokwe, ne kuzhimya bukaji bwa mujilo, ne kupuluka ku mpoko, kubwezha bafwa ku bumi jibiji, kabiji ne kuuba misango yonse ya byakukumya, ke mambo akuuba mba bajinga na yewa kii kabiji bayukile mba kingila, mambo wajinga kii wasemwa mu-Kinembelo.

⁶¹ Pano, inge Amiwa mbena kundosa na mafunjisho a bantu, Amiwa kechi nayuka byo kisakuuba ne. Inge baamba mba “kipwilo kyami kifunjisha *kikye*,” Amiwa kechi nayuka pa kyokyo ne.

⁶² Pakuuba inge Baibolo wikifunjisha, kabiji Nakwata kii wa lwitabilo mu kuboko kwami, nangwa mu muchima wami, akyo kyaamba mba “akyo kyo Kyambo kya Lesa,” akyo kikazhimya bukaji bwa mujilo, kikashinkula lubuko ku bakolwa, kikashinkula lupulukilo ku balubilamo. Nafwainwa kwiya ku Kibelo, bintu byonse biji mu Jizhina Janji. “Kyonse kyo muuba mu kyambo nangwa byubilo, byubilai byonse mu Jizhina Janji.” Byo twayuka mba kii ye uji nanji ke lwitabilo, mambo ke kii walengwa na-Kinembelo. Pano, inge kii wa lufunjisho lwa bantu, kii wa dinominesheni, Amiwa kechi nayuka byo kikoba ne. Pakuuba inge kii wa Kinembelo, ushinkula, mambo Lesa byo aambile. Pano, oo, kechi kyakukumya ne bazhindamikile bukaji bwa mujilo, kabiji ne bikwabotu, bajinga na kii.

⁶³ Lesa kwitabizha kwanji kutanshi ku umo ba booba bangauzhi, kafwako kya kwibakanya ne. Aye kechi waubile byo Oba kwi amiwa bimye bimo, kwamba jikwabo ne jikwabo, kabiji kapepo anweba (Naketekela kape ine), bino watwajijilatu na kumbula, “Yanga ukobe *kikye*,” kabiji nanchi witutula pakuya kulutwe, “Nanchi yanga ukobe *kikye*,” kabiji “Bwelai kunyuma na kwikyuba jibiji, kechi mwikyubile bulongo ne.” Kuswishatu kumo kucheche! Kijitu, bakonsha kumvwa Mupashi wibabuula mba, “Kyo kintu kya kuuba,” kabiji kafwako nangwa kimo kyakonsha kwibakanya ne. Mulongo, abo—abo—abo bashikile tunwa twa babokwe, byo bapulukile ku mpoko, bazhimine mujilo, baubile bintu byonse. Kuswishatu kucheche kufuma kwi Lesa, mambo ba kwachile kii mu kuboko kwabo, alwa lwitabilo lukatampe! Baubile bintu bya kwa Lesa mambo kafwako nangwa kimo kyakonsha kwibakanya ne. Oo, byaikala byalukumomo!

⁶⁴ Nobe mwanamulume mwananyike kimye kimo waishile kwi mulongo mukulumpe wajinga muntu wa bulesa, ngauzhi mukulumpe wa Lesa. Kabiji waumvwanga yewa muntu kimye kyonse nakupana lushimuno, watwajijiletu na kwamba pa buwame bwa Lesa, kabiji ne Lesa byo ajinga, kabiji ne Kilishitu byo ajinga, kabiji ne kuyatu kulutwe, na kwamba. Kyapelako, awe nsongwalume bayilenga na kumwikajika mu mwingilo, nanchi waile ku umo mukulumpe wamaana, kabiji aye waambile kwi aye mba, “Mwane, Nasaka kukwipuzha jipuzho.”

Aye waambile mba, “Impuzhai, mwanamulume mwanyike.”

65 Aye waambile mba, “Bushe Kilishitu uji na kilumbululo kyabaya kwi obewa byonka byo mwamba mba Byokiji?”

66 Aye waambile mba, “Aye uji nakilumbululo kyabaya kwi amiwa kukila byo Nakonsha kwikala na mwela wakupema!” Abyo byobyo kiji. Kyajinga kika? Aye wataine kii.

67 Awa mwanamulume mwanyike waambile mba, pa kyokyo, “Inge waamba bibye bintu, kabiji waamba kwi amiwa mba byaikala bya kine pamo nobe byonka byo uji obewa, nanchi Nasaka kuyuka awa yenka Yesu umo, mu bukishika bumo.” Kyajinga kika? Aye wayukile mba awa mwanamulume mukote wajinga na kii, ye akonsha kunshikula kabiji ne kushika.

68 Mwayukatu, kii ushika, ushikula, ne aye. Mwamona? Obewa wakonsha kukasulula nangwa kukasa. Abyo ibyo. Yeka kii umo ushika, ushikula. Awa kii ushikula, wakonsha kushika. Kabiji abyokine byokiji, monai, mambo kingila monse mubiji. Byo kyaikala kyabulanda mba kipwilo kyataya kimonwa kyakyo kya kyokyo! Kyajinga kintu kyabulanda bingi kimye kipwilo po kipoteshe akyokine mu mafunjisho a kipwilo, nobe byonka byo twauba leelo, kabiji pano kekwi mba twikale bakwatakana.

69 Twamona butangi bukatampe bwa Kiloma ne abo babena kusambaka pamo, babena kuya na kupipula mitanchi yavula. Nalangulukile mba kechi bapipula ne; bino babena kuya na kuuba, nangwa byonkabyo, kupana pulisiti umo bulume bwa kwa papa, kabiji—kabiji konse ko aji, ne bikwabotu. Ke kyabulanda bingi, kyakuuba mba kipwilo kyapotesha mafunjisho a kipwilo mu kifulo kya Kyambo. Mwamona? Apo ipo po bashijile kii, ponkapa. Ao oene mambo byakukumya bikatampe ne biyukilo kechi byubiwa mu bantu leelo ne, abyokine byaikalangako kala, abo bataya kii! Ee, bayuka Kibelo, abo bayuka mba Kibelo ko kiji, bino kintu kikwabo ke kii wakushikula Kibelo. Bya bunoshi biji kunyuma ya Kibelo. Abyo byashikilwa, bibule kumweka ne, ku wabula kwitabila. Pakuuba waitabila, uji na lwitabilo kabiji wakonsha kutola kii wa lwitabilo, wakonsha kunshikula bibye Bibelo. Ee, mwane.

70 Kimye kimo kuno myaka icheche yapitapo, kwajinga mulongo misonale, kabiji waumvwine mba uji na lwito lwa ku Africa. Aye wajinga mulongo mwanyike; mukazhi ne baana babiji, bajinga balamba bingi, bansongwakazhi bakwanyike, pepi nobe myaka sebeni nangwa eiti, yalupusano. Kabiji awe mulongo mwanyike kechi wakonsheshe kufumako ne. Aye wajinga wa—wa mwingilo, wajinga na kipwilo kyawama mu kyaalo. Bino aye kechi wakonsheshe kufumako ku lwito ne, aye “wafwainwa kuya ku Africa.” Kabiji aye walombelenga, mute ne bufuku. Aye kechi wakebelenga kuya ne. Kabiji Lesa watwajijiletu na kwamba kwi aye, “Obewa wafwainwa kuya!”

Kabiji pa kupezhako waishile wafika pakifulo, kya kubekya, apo, aye—aye po afwainwa kuya!

⁷¹ Nanchi wayile ku kije kyamishonyi kya kipwilo kyanji, kabiji aye waambile mba, “Lesangita wanga amiwa ku bumishonale mwine mujisaka ja—ja mu Rhodesia.” Kabiji mujije jisaka jayulwa na malelya, na mashika ne juba jakaba, myalo ne kalepu, kabiji ne misango yonse ya bikola mu jije jisaka, kuji konse nkoayilenga na... mu bumi bwanji bonse. Wapotesha nzubo yanji kabiji byonse byo ajinga nabyo. Nanchi kije kya mishonyi kyakebele kumweseka, kabiji baambile mba, “Kine obewa ubena kukeba ponkapano?”

Aye waambile mba, “Amiwa nashiniinwa.”

⁷² Abo baambile kwi aye, “Mwane, bushe walangulukila mu uno musango, amba uji na bansongwakazhi babiji balamba bingi, kabiji obewa uji na—na mukazhi mwanyike watemwikwa, kabiji inge ujitu... Kika kyakubula kuya na kumonako byo kuji kabiji bino apa wabwela jibiji?”

⁷³ Aye waambile mba, “Ine, aye Nkambo wambujile. Oo, kyajinga kya kine!” Aye waambile mba, “Aye Nkambo wangita. Kabiji Ami—Amiwa kechi keba kusha nzubo yami ne, Amiwa kechi keba kusha kipwilo kyami ne bantu bami ne, pakuuba Lesa wangita amiwa amwa mwine mujisaka.”

⁷⁴ Kabiji aye waambile mba, “Mwane, bushe wayuka bansongwakazhi bobbe babacheche bafwainwa kukwatwa na mashika akibobo nangwa mashika ameema afita, ne kufwa, mu bufuku bumotu?” Kabiji bamutongwejile bantu bapusanapusana bafwinshishe baana babo, balunda babacheche, kwibatwala kokwa, kuji bikola byabula michi ya mantombi. Kabiji baambile mba, “Langulukai pa mbumba, mukazhi obe walamba ne bansongwakazhi babiji babacheche bafwainwa kwikala na mbumba, kabiji ne joja juba jakaba ne bintutu bikwabo byafwainwa kutanwako.” Baambile mba, “Obewa kechi uji na moyo ne, kabiji bulemo bwa kutwala baana bobbe ne bakazhi mu kyokya kifulo?”

⁷⁵ Kabiji bamishonale baimene ponkapa, mulunda mwanyike, kabiji mipolo yatatwile ku kukuluka pa mabuta anji, aye waalulukile, waambile mba, “Balongo bami! Kimwesho kyami kya lwito lwa Lesa,” waambile mba, “Inge Lesa wangita ku Africa, baana bami ne kisemi kyaikala kyakikizhiwa bingi kwikala mu Afrika kukila mpuzha iji yonse panopantanda.” Amena. Kyajinga kika? Aye wajinga na kii wa lwito kwanji, aye wajinga na lwitabilo mu byo aambilengapo. Oo, Nalangulukile, mba ke ng’ambilo ya kuchichika kwabaya bingi! Kimye kitanshi kyo Naumwine kyokyo, muchima wami walukuchile. Monai, “Inge Lesa wangita ku Africa, baana bami mu mbumba ne mu myalo ne bintu bikwabo, baikala bakikizhiwa kukilapo pa

pampuzha iji yonse ya panopantanda.” Aye wajinga na kii. Abyo byo kyubiwa.

⁷⁶ Umvwe uji na kii, kechi kujipo moyo ne, kechi pajipo luzhinauko ne, kechi pajipo jipuzho ne. Anweba kechi mwafwainwa kwipuzha muntu uji yense pakikye ne, obewa wayukisha bulongo. Uji naji mu maboko obe, wayuka mwakubila. Amena. Obewa wayuka bya kumwenamo, obewa wayuka mba kibelo kisakushikuka. Obewa wupalanguzha kipabi kabiji wayuka mba kyo kintu kyalumbuluka, kibelo kisakushikuka inge watayamo kii mukachi.

⁷⁷ Oo, inge kipwilo kyajinga na bakii! Inge kipwilo kyajinga na kii wa lwitabilo, twakonsha kunshikula kibelo kiji kyonse, misongo iji yonse, mwalo uji yense, lukatazho lonse lujiko. Kyafwainwa kunshikuka kwi atweba inge twakonsha kukwata yuwe kii. Awe muntu wajinga na kii wa lwito lwanji.

⁷⁸ Inge mwafwainwa kundekelako mambo na lushimuno lwami. Navuluka pepi nobe fiftiini, myaka sebetiini yapita, pepi nobe, kimye Nkambo kyo aambile kwi amiwa kokwa ku mukola, byo Aikijile mu yewa Mumbulungwa wa Mujilo ao kipikicha Kyanji kyo mumona, kabiji Aye waambile kwi amiwa kabiji Waambile mba, “Obewa ukatwala iye Mbila pantanda ponse.”

Kabiji Navuluka ku Green Mill byo Aambile kwi amiwa.

⁷⁹ Kabiji Naile na kubuula bakafunga, kabiji wambujile, mba, “Billy, wajile ka abwa bufuku? Wajinga na lubazhibazhi.” Aye waambile mba, “Yanga bwela ku mwingilo obe. Obewa ubena kwingila ku Public Service Company, uji na kinto yawama, yanga ubwele na kulamawizha yobe—yobe kinto, mwanami.” Waaambile mba, “Obewa wajinga na lubazhibazhi. Obewa wajile kintu kimo.” Akyo kechi kyakokeshe nangwa pachechetu ne!

⁸⁰ Byo Natatwile kuya ku mpwijilo ya lubuko, anweba bavula muno mwavuluka Mbila yami alwa lukeelo, *Nobe Davida Byo Aile Na Kukumanya Golyata*, Nasapwijile pakyokyo.

⁸¹ Kabiji bambujile mba, aye waambile mba, “Mu jino juba jasayaasi wakatataka, byo tuji na misango yonse ya kupesapesa kwa michi, kimye kyo tuji na bandokotala bawamisha, apo kipwilo po kyalubamo bya lubuko lwa Bulesa ne bintu bikwabo pa yavula, yavula myaka yapitapo, obewa ubena kuya byepi ku kintu kikatampe kiji muyo musango? Usa kwenda byepi ku meso aba Methodist, Baptist, Presbyterian, ne bikwabotu, kabiji kubikapotu ne ba Pentekosito, abo balubako pa kimye kyabaya kyapitapo, ne kuya mu mafunjisho a bipwilo byabo? Obewa ukakumanya byepi, kwakubula ne dinominesheni nangwa kintu kimo kyakukupa bukikizhi ne? Kika kyo ukooba obewa, Bill?” Musango umo, ne mukwabo, kechi kyakokeshe nangwa pachechetu ne, mambo Nalamine kii mu kuboko kwami! Naambile mba... Baambile mba, “Kafwako nangwa

umo wakonsha ku kuketekela ne. Obewa kechi wakonsha kwikyuba ne. Kafwako nangwa umo wakonsha ku kuketekela ne.”

⁸² Naambile mba, “Amiwa kechi natako muchima ne. Paji kintu kimo kine kyaketekelwa; Lesa wangichile, kabiji Nafwainwa kuya mambo Lesa wangichile.” Nakwachile kii. Aye wangichile, Aye wamwesheshe, Aye waambujile, kabiji Namwene Kyeenyi Kyanji kimye Aye kyo ampele mwingilo, kabiji kii wajinga konka!

⁸³ Bakafunga baambile mba, “Na kufunda kwakufika mu guleendi-sebeni, kabiji ukasapwila ne kulombelela ba mamfumu ne bilolo!”

Naambile mba, “Abyo ibyo mwaila Kyambo Kyanji!”

⁸⁴ Pa kino kimye mwaka wapwa, nangwa mulungu umo nangwa ibiji kasa ikyangye kufika, byo Naishile kuno ku kipwilo ne mubujile mba Nkambo Lesa wapa kimwesho, kya kuya na kwipaya nyama, kabiji ne—ne nyama umo Ye katana, ukekala na masengo alepa-foote-inch. Kabiji mu jishinda pakubwela na kwipaya yuwe nyama (apo po alajile, kifulo po akekalapo), pakubwela Amiwa nkepaya mbeyala watokoloka-siliva kwapela. Kabiji Naile ku lulwe lubaji, kabiji Naambile ku mwanamulume, kabiji waambile mba, “Amiwa kechi nayuka nyama uji yense umweka byobyo ne. Kabiji mwayila mbeyala watokoloka siliva, Amiwa kechi nakimonapo nangwa umo ne.”

Naambile mba, “Bino kuntu kumo wafwainwa kwikala kuno.”

⁸⁵ Nanchi aye waambile mba, “Atweba kechi tukatwela mu kyaalo kya ba mbeyala ne. Atweba tubena kuya ku mikoko, akwa kwine kuji bichi bya mapulanga.” Kyawama, Naile nanji.

⁸⁶ Kabiji juba ja bubiji, mu kyonka kya kifulo, apo Nkambo po aambile mba, po paikala nyama. Nanchi byo Naile na kutola nyama, kabiji kimye kyo twasendelenga kikoba ne masengo kabiji ne bikwabotu, kwibifumyako, aye waambile mba, “Nasaka kukwipuzhako kintu kimo. Obewa wambujile mba, moba asatu apita byo twafumine pa—pa mwimba, amba panyuma ya kuloza yuwe nyama, amba mu mukwakwa pa kubwela ‘ukepaya mbeyala watokoloka-siliva kwapela.’”

Naambile mba, “Abyo BYOBYAAMBA AYE NKAMBO!”

⁸⁷ Waambile mba, “Amiwa kechi mbena kuzhinauka ne,” aye waambile mba, “mambo mulongo wami wajinga wakashita, kabiji kechi wamumwenepo mu bumi bobbe ne, kimye kyo wajinga kuno kimye kimo, kabiji wambujile mba nsongwalume usakutambula lubuko inge Naubapo kintu kimo. Kabiji byo ajinga.” Aye waambile mba, “Pano, bino, Mulongo Branham, Nasaka kukwipuzha obewa,” aye waambile mba, “Nakonsha kumona kuya ku yewa mutumba ako kwajinga bichi bya

mapulanga, aba bambili baimana. Kabiji kafwako kijiko kokwa ne. Kechi kujipo nangwa lusono umo ne, kechi kujipo nangwa jibwe ne, kafwako nangwa kimo kijiko ne.” Mfumbo kakololo, ao uji pepi nobe mainchesi abiji kulepa, peulu ya bichi bya mapulanga, mailoshi umo nangwa kukilapo pa bichi bya mapulanga. Waambile mba, “Kwepi kusakutanwa mbeyala?”

⁸⁸ Naambile mba, “Lesya ye Jehovah-jireh. Inge Aye wambujile mba ukekalako mbeyala, kukekala umo.”

⁸⁹ Mushi ya mutumba, pepi nobe kimye kyonse kyo twapita afu mailo nangwa paji byobyoy, pepipepi, aye waambile mba, “Mulongo Branham, pano ke kimye kya kuba mba mbeyala amweke.”

Naambile mba, “Kechi musakamane ne, aye usakwikala konka.”

⁹⁰ Kabiji byo twajinga pepi nobe mayadi faivi aduleendi pajinga ba mbili, twakokolokele ne jikwabo na mambo a kunema kwa masengo ne bintu byajinga panyuma yetu. Kabiji wakeketele ne jikwabo, kabiji Namwene kilungi kyanji byo antajile kwi amiwa, nobe mu muchima wanji wakuminyenga. Monai, aye *waketekejile* mba wafwaiwa kwikala konka, bino kechi wajinga na kii ne.

⁹¹ Bino nangwa byonkabyo, monka mu bupe bwa Lesya, Aye kechi wakikalwapo ne. Kimye Aye kyo ambujile mba kukekala wa watokoloka-kwapela, Najinga na kii. Amiwa kechi nazhinaukile nangwa pachechetu ne, nangwa jimo ne. Naalulukijile kwi aye, kabiji Naambile mba, “Mulunda, ukekalako.” Kabiji byo Naalulukile, awa mbeyala wajinga ponka [Kafwapo bijipo pa tepu ne—Waku.] kasa aimana peulu yetu, pepi nobe afu wa mailoshi.

⁹² Aye watajile mu magalashi, waambile mba, “Billy, nanchi nkwashe, mukatampe wapelako-siliva!”

⁹³ Monai, kii, kimwesho, Kyambo kya Nkambo, kechi pajipo kintu nangwa kimo kyakonsha Kwikyululula ne nangwa Kwikikanya ne. Kibena kukeba kipwilo bufuku buno kechi ke kufunda ne. Kibena kukeba kipwilo bufuku buno kechi dinominesheni ne. Kibena kukeba kipwilo bufuku buno kechi lufunjisho lwa kipwilo ne. Kibena kukeba kipwilo bufuku buno ke kii wa mu Binembelo, ye Kibelo. Awo, Kilishitu ye Kibelo, kabiji Aye ye Kyambo. Lwitabilo mu Kyambo kyumi kya Lesya kinshikula kizhilo kyonse.

Lesya, tupai kii. Tupai kii.

⁹⁴ Bahebelu, kyapitala kyabu 12, waamba mba, “Byo twamona kuuba mba twazhokolokwa na jibumba jikatampe ja batumonyi jiji byonka bino, twayai tushe kinemezhi kyonse, kabiji ne kubula lwitabilo abyoy bipelawizha kwitusendula.” Kyaamba

mba “bubi,” akyo, *bubi* ke “kubula kwitabila.” Mwamona? Bubi bumotu, abo ke kubula luketekelo.

⁹⁵ Kabiji *bubi* kyalumbulula mba “kutupila kimiko.” Kijitu pamo nobe ubena kuloza, watupila kimiko, kyawama walinganya bulongo buta bove, monai, mambo pajipo kintu kimo kyatama. Obewa watupijile kimiko. Monai, bwelai ne kweseka jibiji. Mwamona? Kyalumbulula mba kwaluluka jibiji, watupila kimiko. Inge ubena kukeba kwikala Mwinakilishitu, kabiji watwela mu kipwilo, obewa wapusa kimiko. Inge mubena kukeba kwikala Mwinakilishitu, kabiji wasaswa mu jizhina ja “Taata, Mwaana, Mupashi Wazhila,” obewa wapusa kimiko. Kyawama kubwela jibiji. Obewa kechi ukekala pa kimiko ne. Obewa ukapalang’anya, kine monka mwaikela ntanda. Kujitu Kintu kimo kyakonsha kukwachila mu ndoonda yalumbuluka, akyo kyo Kinembelo, Baibolo, kyo Kyambo. Mambo, byonse meulu ne ntanda bikapita, pakuuba Kyambo kya Lesa kechi kikapita ne.

⁹⁶ Nanchi, lamai kii, lwitabilo mu Kyambo! Kabiji lwitabilo lonse lo mwaketekela, kabiji kwakubula kuzhinauka nangwa pachechetu ne, obewa wakonsha kushikula kibelo kiji kyonse kyaimana pakachi nkobe ne jipesho ajo Lesa jo akutuujila. Lekai Lesa etukwashe twikale na bakii, yo milombelo yami. Twayai tukunyike mitwe yetu pano tulombe.

⁹⁷ Taata Wetu Wamwiulu, twimusachila Anweba bufuku buno mambo Anweba mwitupa kii wakushikwilako lupulukilo. Amiwa—Amiwa ne musachila Anweba pa kyokyo, Nkambo, pakuuba mba twapuluka, kabiji ne pa kii yetwingijisha kufika pa kimo kimye. Bino, Lesa, tupai lwitabilo, amba byonse bye Byambo bya nembwa mu Buuku Wenu bikale bipabi bicheche, kabiji awe Kii watelwa mba Yesu...akye Kibelo, Natazha mu kuuba mba, watelwa mba Yesu; kabiji kii, watelwa mba lwitabilo, ukwata Kyambo kyonse, wikinshikula. Kyendesha kikye kipabi kicheche pakuuba mba tutwele mu jojo jipesho. Taata Wamwiulu, tupai bakii, pakuuba mba twikale na lwitabilo mu milaye yakwa Lesa, pakuuba mba lwitabilo lwetu kechi lukakalwe ne, pakuuba mba twikale bakwimwingijila Anweba kabiji ne kubooba bo twingila nabo.

⁹⁸ Tulekelai bubi bwetu bonse bwa kubula kwitabila, Nkambo, kabiji tukwashai kwikala Bakwenu. Tubena kwiya pano ku tebulu wa kijilo, kabiji Nalomba, Taata wa Mwiulu, amba Anweba musakwitulekelako mizhilulwila yetu yonse, pakuuba mba twakonsha kutwela mulusekelo lwa lumvwang’ano lwa bupopweshi lwa ku tebulu wa Lesa. Twikipuzha mu Jizhina ja Yesu. Amena.

⁹⁹ Mulongo wami, nyenga, inge uji na kii bamu Bufumu, kii wa ku Kibelo, kii wa lupulukilo, Lesa emukwashe kushikula bibelo

ne kuleka Yesu atwele mukachi. Lekai apane kwi anweba bintu byo—byo mwakabila.

¹⁰⁰ Pano, pa kakimyetu kacheche kasa tukyangye kutatula kutanga pa kijilo, Nasaka kwamba pa kintu kimo mambo kiji pa kijilo. Kabiji umvwe twaiya ku kino kitapisho, kujitu jishinda jimo ja kwishilamo, ko kuuba mba, inge twalama kii wa lwitabilo mu maboko etu, kyakuuba mba mwituyukishe mba bubu bwetu bwalekelwa. Kabiji umvwe kechi tuji na yewa kii ne wakushikwilako akya Kibelo, amba bubu bwetu bwalekelwa, atweba kechi tujipo na mwingilo ku tebulu wa Nkambo ne. Mambo, aye uja ne kutoma mwabula kufwainwa, wijiila ne kwitomena luzhachisho aye mwine, pakubula kumona mubiji wa Nkambo ne. Pano, akyo kya kine.

¹⁰¹ Naketekela mba atweba bonse twayuka mba jaleelo ke Juba ja Kijilo kya Kyaalo. Aje ke juba bipwilo byonse jo baja kijilo. Ke Juba ja Kijilo kya Kyaalo kyonse. Kabiji Nalanguluka mba kyakonsha kwikala kyawama kwamba kyambo nangwa bibiji pa kijilo kasa tukyangye kwi kija ne, akwe kafunga, inge waswa, anengezhenga Binembelo bya kutanga bya—bya ndoonda ya tebulu wa Nkambo. Pano, akye kijilo. . . Pano, Amiwa kechi nsakusenda pabaya ne kanatu pepi nobe mamineti teeni.

¹⁰² Akye kijilo kyo tubena kunengezha kuja, kyaikala ke kyalupata lwabaya bingi mu lufunjisho luji mu Baibolo. Akya kyajinga kyabo. . . kimo kya bintu bitanshi byaletele lupata mu kipwilo kitanshi. Kabiji leelo ba Polotesitati, ba Episcopalian ne ba Methodist, kabiji ne bipwilo byavula bya ba Polotesitati, bakonsha kutambulwila na lusekelo Katolika, lufunjisho lwa Katolika wa Loma, inge bakonsha kufika pa jimbapu jicheche ja kijilo. Bino abo baswa amba pulisiti wafwainwa kusongola pakuuba mba bekale bamwingilo, kipwilo kya Bakatolika baswa pa bimye byavula bya mumbung'eno yabo ne makofalesi. Abo baswa pakyokyo. Kabiji abo baswa pa milombelo yavula yapusanapusana, kabiji ne bikwabotu, kipwilo kya ba Polotesitati kiswang'ana pa kyokyo. Kabiji katekizimu ne bikwabotu, kitapisho kicheche papo ne popa, kabiji kipwilo kya Katolika kibena kuswa kwikyuba. Pakuuba umvwe kyaiya ku kijilo, apo po bakakelwa. Muntu yense watangapo jishimikila wayuka kyokyo. Bino, mambo, mwayila milanguluko yami, baji na byavula byakufuminako, kasa Kyangye—Kyangye kwi kiswa ne, mwamona, mambo kechi Baibolo ne.

¹⁰³ Bino Nasaka anweba mwambe kintu kimo ku kipwilo kya Katolika. Bushe mwayuka kipwilo kya Katolika, kuntendekelo, kyajinga kipwilo kya batumwa kya pentekosito? Kine byo kyajinga! Kyajinga ntendekelo itanshi ya kipwilo. Kabiji mwamona abo—abo koobaya, batwajijiletu na kufumyako ku Kyambo kabiji akwe kasa batwezhamo mafunjisho angi.

104 Kabiji inge kipwilo kya Pentekosito kyaikala myaka ikwabo aduleendi, kyakonsha kwikala kwalepesha kufuma mu Baibolo kukila kipwilo kya Katolika leelo, mwayila jishinda jo babena kuyamo.

105 Kyasendele kipwilo kya Katolika bimye byavula, myaka aduleendi pa kufumako kwi Akyo, myaka fiili aduleendi, kufuma ku kipwilo kitanshi batatwile kwikyalula bukabungwe kipwilo kya Katolika wa ku Loma, byo kyatatwilwe kubiwa. Kabiji bakwatwa mba, baletamo bakatampe bamunema ne bintu bikwabo, kabiji bafumyamo *bibye* ne kubikamo *bibye*, kabiji bafumyamo *bibye* ne kubikamo *byobya*, kabiji batola bakishi ba butunshi bebapa mazhina a Bwinakilishitu, kabiji ne bikwabotu, kabiji ne kunekenya bintu Kyakuuba mba bafika ne pakipimo kyo bajipo leelo, kipwilo kya Katolika wa ku Loma.

106 Kabiji kipwilo kya Polotesitati Pentekosito kufuma pa—pa myaka fiifite yo baikalako, kabiji po kyaponejile kufuma po kyatatwijile, kikekala ke musango watamishatu kukila kipwilo kya Katolika, pa myaka aduleendi kufuma kino kimye. Abo ibyo. Akyo ke kyambo kikatampe kwikyamba, bino talai pafumina kupona kwaabo. Abo bailetu mu kabungwe, baile na kunekenya bintu pa *kikye* ne *kyokya*, kabiji ne bintu byonse. Kabiji byobyo baya, monai, kubwela lunyuma.

107 Bino, *kijilo*, kyatelwa mba “kijilo kyamulajilo kya Nkambo.” Pano, bantu bavula, basaka kwikija mu lukeelo. Kechi kyaambiwa mu Baibolo mba kajo Kanji *kakwiaula*. Kabiji abo bantu leelo, bakonsha kwamba mba “kijilo kyamulajilo kya Nkambo,” kabiji kechi bakonsha ne. Abo bafumyako *kijilo kya mulajilo*, kabiji bekishako, ne kwikitela mba “kajo kabufuku,” kafwako maana. Kijilo kya mulajilo!

108 Pano, kimye kyonse kyajinga kyamapata mu bimye bya mu Baibolo, kyajinga kya kyamapata pa kyokya kimye. Bantu kechi bakwatakenye kijilo kya mulajilo kya Nkambo ne. Umvwe baiya ku tebulu, Paulo wabujile bena Kolinda, abo baishilenga na kupendwa ku tebulu wa Nkambo. Monai, kechi bekikwatakenye pakyokya kimye ne. Aye waambile mba, “Inge ubena kukeba kuja, jila jimo kumuzhi.”

109 Kabiji kintu kikwabo, kechi bekikwatakenye, byo kiji ne. Bandengamambo, kabiji muntu ubena kwikala mu bubi, baishile ne kuja kijilo. Kabiji akya kyajinga kyakubula kukwatakanya. Mwanamulume waendelenga na inanji, bainaji bamukashanji, kabiji kipwilo kyamubujile pa kiky; nangwa byonkabyo kasa bakija kijilo ku tebulu.

110 Kabiji amwa mwajinga mepatulo mukachi kaabo, bino kasa bakija kijilo. Aye waambile mba, “Nayuka mba anweba mubena kwenda nobe ba Ngetila bashala. Kabiji muji—muji bingi byalupata mukachi kenu, nobe biji ku—kukijishamo mu nzubo ya kwa Kefasa, ne bikwabotu.” Waambile mba, “Anweba

mwenda nobe bashala Bangetila.” Monai, kechi bekikwatakenye ne.

¹¹¹ Kiji kimye kyonse kechi bekikwatakenye ne. Pano, Nakonsha kuyatu pa ma awala, pakuuba twafwainwa kuja kikyeye kijilo ne komvwa-kumaulu. Pano abo balubijilakotu komvwa-kumaulu, bino madinominesheni achechetu. Bavula ba Pentekosito balubijilakotu. Mwamona? Kabiji kikijitu mu Baibolo byonka byo kyanembelwe. Mwamona?

¹¹² Pano, Loma kechi wakitela mba “kijilo ne.” Abo bekitela mba “masi, ke masi wazhila.” Abo kechi baja kijilo ne, abo baja masi. Ke masi, kabiji masi wafumyamo kine kilumbululo kya kijilo. Awa *masi* kyalumbulula mba “kuketekela.” Abo baja masi, ne kuketekela mba (pakuuba kikyeye mu masi) amba Lesa ukebalekela mambo abo, na kuja “mubiji mwine wa Kilishitu, ao pulisiti umwalula ke Mubiji kabiji ne Mashi akwa Kilishitu,” kuja kyokyo, naketekela mba Lesa usakulekela bubi bwabo pa kuuba kyokyo. Ke masi.

¹¹³ Ba Polotesitati bekitela mba “kijilo.” Kijilo kyalumbulula mba “kupana lusachilo.” Amba ba Polotesitati. . . Ba Katolika babena kuja masi, mu masi nakulanguluka mba Lesa wibalekela mambo pa bibi byabo. Ba Polotesitati bekija na kusachila pa byaubiwa kala pa kuja kijilo na Lesa; kushilang’ana Nanji, amba kyaubiwa kala. Ba Katolika babena kuketekela mba kyaubiwa; ba Polotesitati baamba mba kyaubiwa kala. Ba Katolika babena kukumya kana bubi bwaji bwalekelwa; ba Polotesitati babena kwisolola mba balekelwa mambo, kuuba mba wakasuluka. Kabiji kijilo ke kushilang’ana na Lesa. Kabiji abye bingijisho byo tuja, kechi mu *luketekelo* amba bubi bwetu bwalekelwa, bino *kasa* bwalekelwa. Mambo ke. . . Umo ke luketekelo; kabiji mukwabo ke lwitabilo. Umo ubena kuketekela mba ujitu bulongo; kabiji mukwabo wayuka mba uji bulongo. Mwamona? Mukwabo, umo ubena kuketekela, mambo kechi wayuka po aimana ne; mukwabo wayuka mba uji bulongo, mambo aye wayuka byaambile Lesa. Abyo byokiji. Alo lolupusano. Nanchi, inge ubena kuketekelatu, ikala wajimuka; bino umvwe wayuka, nanchi yanga kulutwe. Mwamona, nanchi uji mulumvwang’ano na Lesa. Polotesitati ye, waamba mba walekelwa kabiji wikiyuka; ba Katolika baji na masi, luketekelo lwa kwamba mba ukalekelwa mambo. Kijitu pamo nobe bibye: umo ke kalomba, ubena kuketekela mba bintu byonse bijitu bulongo, mwamona; mukwabo ke kalomba ubena kusachila pa byobya byaubiwa kala. Bonse babiji bakalomba. Bino umo ubena kulomba, na luketekelo lwa kwamba mba ukekitambula; mukwabo kalomba wayuka mba uji nakyo, kabiji wamusachila Aye pa kwikipana kwi aye. Pano, alo lolupusano. Akyo ke kijilo. Ee, mwane. Umo ubena kuketekela mba walekelwa mambo; mukwabo wayuka mba aye walekelwa mambo, kabiji ubena kupana lusachilo.

¹¹⁴ Nanchi, kijilo kya Benakilishitu abo basemwa jibiji ku Mupashi wakwa Lesa. Kabiji *kusemwa jibiji* kechi kyalumbulula mba pano obewa uji na Mupashi Wazhila ne. Pano vulukai. Pano, bavula bafunjisha kyokyo. “Amiwa kechi nayuka muntu uji yense wikifunjisha bibye ne,” nobe byonka byaambile mukulumpe Mulongo Arganbright waambile abwa bufuku kuno ku pulupiti, mwamona. Bino, kusemwa kupya kechi ke lubatizhilo lwa Mupashi Wazhila ne. Akyo Kinembelo kechi kiswisha kyokyo ne, Amiwa kechi ndanguluka mba, monai, mwaila mombena kwikimwena. Mwamona? Naketekela mba anweba mwasemwa jibiji. . .

¹¹⁵ Kabiji ao oene mambo Amiwa kyo nyingijisha kyambo kya lubatizhilo mu Jizhina ja Yesu Kilishitu, bino kechi mu kusangululwa ne. Pano, ba Pentekosito, kipwilo kya United Pentekosito, babatizha mu Jizhina ja Yesu Kilishitu mukusangululwa. Amiwa kechi naketekela kyokyo ne. Kabiji bakonsha kwikyuba inge bakeba kwikyuba. Bino Naketekela mba Petelo waambile mba, “Lapilai,” patanshitu. Meema kechi afumya mambo ne. Akyo Kipwilo kya Kilishitu kisapwila byobyoyo. Bino Naketekela mba lulapilo, bulanda bwa bulesa; *lulapilo* kyalumbulula mba “aluluka, bwela,” obewa watupila kimiko, “watatula ne jikwabo.” Ubai kyokyo patanshi! Kabiji lubatizhilo lobe lwa mu meema ke nyingijilo ya pangye ishimuna amba kintu kimo kyaubiwa mukachi koobe, mba obewa wamutambula Kilishitu kwikala Mupulushi obe.

¹¹⁶ Naketekela mba ke kipwilotu muno bufuku buno, nobe byonka byo Nayuka, Amiwa kechi ngikalako kimye kyabaya kya kuyuka mba awe wiya kabiji awe ine. Amiwa najimbulwilwe pacheche kuno kechi papita kimye kyabaya ne byo nabatizhenga muntu mu kizhiba, mulunda mukote. Kabiji Naile kwi aye, wajinga mwanamulume mukote wawama bingi. Najinga najishuko ja kutangijila kisemi kyanji kwi Kilishitu, bonsetu Benakilishitu. Awe mwanamulume mukote wajinga muntu wawama bingi, kabiji Namutemenwe, nanchi Naile kwi aye kabiji Naambile kwi aye mba, “Taata, kika kyo mwabujila kwikala Mwinakilishitu?” Aye watemwa.

¹¹⁷ Aye waambile mba, “Mulongo Branham, Amiwa nakonsha kwikala Mwinakilishitu inge Nakonsha kwikala wawama.”

¹¹⁸ Naambile mba, “Nkubuule byo uba, Taata. Anweba talai konse konse poso mwikale wawama bulongo, kabiji munkambule ayo mpuzha ko iji, Nakeba kuyako, ne amiwa.” Naambile mba, “Kilishitu kechi waishile na kupulusha muntu wawama ne. Aye wayishile na kupulusha muntu watama.” Inge walanguluka mba wawama, nanchi Aye kechi waishijile na kukupulusha ne. Aye waishile na kupulusha booba bo Ayuka mba batama. Mwamona? Kilishitu wafwile amba apulushe bandengamambo. Mwamona? Kabiji Naambile mba, “Taata, kuji mulaini ponkapo.”

Aye waambile mba, “Kyawama, Amiwa mpepa iye mishanga.”

Naambile mba, “Amiwa kechi nsakwimanapo nabo ne.”

Aye waambile mba, “Naeseka kwibileka, Mulongo Branham.”

Naambile mba, “Kijitu bulongo, kechi tusakwambanga pa fwaka ne.”

Aye waambile mba, “Kyawama, inge Nakonsha . . .”

119 Naambile mba, “Kechi—kechi ukambepo jikwabo pa bibye ne, bileke biyenga. Nasaka kukwipuzha jipuzho.”

Aye waambile mba, “Kijitu bulongo, kyokika?”

Naambile mba, “Bushe waketekela mba kuji Lesa nyi?”

120 Waambile mba, “Kyakine, Nekiketekela.” Waambile mba, “Naketekela mu kyokyo kyakosa byonka byo uji obewa, Nakonsha kufwanyikizha, Mulongo Branham.”

121 Naambile mba, “Bushe waketekela mba awa Lesa umo wikilang’enye Mwine kabiji walengelwe ke muntu ne kwikala waikelenga muno mwetu mu bumuntu bwa Yesu Kilishitu, pakuuba mba apulushe muntu?”

Aye waambile mba, “Ee, Naketekela kyokyo.”

“Kabiji Aye wafwijile mukupulusha bandengamambo nobe byonka byo uji ne Amiwa?” Mwamona?

“Ee, Naketekela kyokyo.”

122 Naambile mba, “Pano, kijitu pamo nobe byonka bye. Atweba bonse tujitu mu kishimikwa kimo kikatampe papo, kabiji tuji mu kaleya, kabiji Amiwa kechi nakonsha kwimana muyuwe koono ne kwamba mba ‘*akye* kyakonsha kukwasha kulupuka mu kaleya ne,’ Amiwa naimana muyewa koono ne kwamba mba ‘*akya* kikakwasha amiwa kulupuka mu kaleya,’ atweba bonse tuji mulukatazho lumo. Kabiji muntu yense wasemekelwe mu inontanda wasemekelwe mu bubi, waimichijilwe mu bubi, waishile pantanda kasa amba bubela. Aye kechi walumbuluka ne, kyakutatwilapotu.”

123 Muntu umo waimpwizhe juba jimo, waambile mba, “Mulongo Branham, inge . . . bushe pajipo lupusano luji pakachi kakwa Adama ne Eva, kabiji ne baana babo leelo, inge bonse bajinga mulekese, na kwenda mu . . . Bushe—bushe mibiji yabo yafwainwa kwikala pamo nyi?”

124 Naambile mba, “Ine, mwane.” Twailenga ku nzubo kufuma na kwipaya baluyeye, Mulongo Fred ne Amiwa, kabiji ne jibumba ja babo. Naambile mba, “Ine, kechi bafwainwa kwikala musango umo ne.”

125 Waambile mba, “Mwatazha mukuuba mba Eva kechi wafwainwa kwikala mwanamukazhi uji nobe baana banji

babakazhi ne, kabiji Adama kuuba waikala mwanamulume nobe baana banji nenyi?"

Naambile mba, "Mu bintu byavula, bino kechi mwayila bibese bya mubiji byonse ne."

Aye waambile mba, "Kika kijipo na lupusano?"

¹²⁶ Naaambile mba, "Abo kechi bakonsha kwikala na mikubi ne. Abo balengelwe. Ibyo. Abo kechi balamichilepo ku kintu kiji kyonse ne."

¹²⁷ Kikulutu akya kitanwa mu bintu byonse byasemekwa pa inontanda, kimweshwa mba kechi kyalumbuluka ne, kyakutatwilapotu. Abyo ibyo. Naambile mba, "Kine, pajipo lupusano. Kechi bajipo na mukubi ne. Abo kechi banungakene ku mukazhi uji yense ne, pakuuba mba wiye pano." Monai, Lesa wi balengele.

¹²⁸ Pano, Naambile mba, "Nasaka kwambapo kintu kimo. Muntu yense uji mu ino nzubo ya bukaleya, ng'anyi wazhila? Ing'anyi ao wabujile kusemwa kupichila mu masongola? Ing'anyi wakonsha kukwasha mukwabo, nangwatu ekale yeng'anyi? Atweba bonse tuji muyuwe kaleya umo. Bino Lesa wilengele Ayemwine umo wa mu bilengwa Byanji kabiji waishile kupitaila pa masongola, kupichila mu Mashi azhila o Alengele Ayemwine, kabiji kupichila mu oa Mashi Aye witukujile." Naambile mba, "Mwaketekela kyokyo, Taata?"

Aye waambile mba, "Naketekela kyokyo."

¹²⁹ Naambile mba, "Kilishitu wafwijile muntu watama uji nobe obe. Bino, kujitu jishinda jimo ja kwikyubilamo. Kafwako nangwa kimo kyo wakonsha kuuba ne. Aye wikipana kwi obewa. Obewa kechi wafikilamo ne. Kafwako nangwa kimo kyo wakonsha kuuba pakuuba mba wikitambule ne. Aye wikipanatu kwi obewa. Wafwainwa kwikitambula akya kyo Akubijile obe, pakuuba mba akulame ku ngehena?"

¹³⁰ Aye waambile mba, "Amiwa kooba kyokyo." Aye waambile mba, "Bino inge Nakonsha kulekatu yuwe fwaka."

¹³¹ Naambile mba, "Tusanga tusakwilama ato twine. Obewa ubatu. . . Amiwa kechi mbena ku kwipuzha ne. Amiwa kechi ne muntu wakosesha mizhilo ne. Naketekela mu bupe. 'Kabiji bonse Bataata bo Baapa bakeya kwi Amiwa.'" Naambile mba, "Inge waketekela kyokyo na muchima obe yense!"

Aye waambile mba, "Na muchima wami yense, Nekiketekela."

¹³² "Nanchi wafwainwa kwikitambula na mwaila ino ndonda, amba obewa kechi wafikilamo ne, pakuuba Aye ye Iye wafikilamo? Kechi witale obewa mwine ne; talai kwi Aye, mambo obewa kechi wakonsha kwiubila obewa mwine kintu nangwa kimo ne. Talai ku Umo waubile kintu kimo kwi obewa. Pano nga Aye?"

“Oo,” waambile mba, “Aye wafikilamo.”

Naambile mba, “Abyo byokiji, nanchi tambula abya Aye byo apaine kwi obewa.”

Aye waambile mba, “Amiwa ne kyuba.”

¹³³ Kabiji Amiwa namubatizhile mu Jizhina ja Yesu Kilishitu. Kabiji aye wafumine kuno waya nakwambula fwaka.

¹³⁴ Milungu icheche yapitapo Amiwa najinga ku kifulo kyanji. Amiwa namwene kimonwa bufuku bumo, kya kichi kya mazhamatamba kyo babena kutema, kyaaluluka mizhazhi yatala mwiulu. Namwene mabbodi apopelwa kwi akyo. Kufikatu ne ku bbondi wapelako awo wajinga wayukanyikwa. Kabiji mushi ya yewa bbondi, ponka pakuyatu kupelo, wanyemenenga nobe *bibye*, kichi kyamokokele ponkapa. Kabiji Jiwi jaambile mba, “Kyafwaijilwe kwikala obewa,” nangwa, “Kyafwainwa kwikala obewa.” Kabiji Taata Cox waponene, wafikizhe nyuma yanji *mumwe*. Kabiji nanchi lukeelo lwalondejilepo bamuletejile tushanga twanji kimye kyo ajinga mu mwanya, ne kilaka kyafuminemo mwi aye. Milungu yapita! Aye kechi watopapo nangwa umo ne, kechi ukebapo nangwa umo ne nangwa kintutu kikwabo ne. Mwamona? Kabiji Namumwene kimye kyapita kunyuma, maboko anji ajingatu achiluluka pose pose, milungu icheche yapitapo, na fwaka, kabiji pano aye kechi wakonsha kutanwapo na umo kulubaji lwanji ne. Bikai bintu bitanshi kwikala bitashi! Kechi mweseke kwikala bawama ne; obewa watama, kyakutatwilapotu, kabiji kafwako nangwa kimo kyo wakonsha kuuba ne. Kuji mulaini wa lwabano, kabiji bantu bonse baji kulolwa lubaji.

¹³⁵ Pano, byo Nasemekelwe mu ino ntanda, kyajinga pakachi ka masongola azhila, pakachi ka bataata ne bamaama; munda mwabo mwajinga jike, mu bumi bwa bataata mwajinga kakishi ka mashi. Bumi bwami bwaikajikwa na kakishi ka mashi (kechi ku jike ja bamaama ne), kana kakishi ka mashi bataata. Kabiji kakishi ka mashi byo kaikela pa kifulo kyako kyaitabilwa mu kusambakana na jike, byo kyaubilwe byobyoy, kitemwa kyakambizhiwe kwi Lesa mu kupana mubiji kwi amiwa. Kabiji pano ipo po Nasemekelwe mu mutundu wa muntu, Nampewe jishuko ja—ja kwikala muntu wajimuka uji byonka biji bantu, apo po Nakonsha kwendesha motoka, nangwa Nakonsha kuuba bintu biji nobe bantu byo booba, kwenda, kwamba, kwendesha motoka, ne bintutu bikwabo. Amiwa nampewe byobyoy, mambo Nasemekejilwe mu kisemi kya bantu, kabiji nampewe bulume bwa maana a kwikala muntu.

¹³⁶ Pano, kimye kyo Nasemekelwe mu kisemi kya Lesa, Naishile mu Mashi, aa Mashi ampele Bumi. Kabiji panyuma ya kwikala Na bumi mwi Kilishitu, Aye wabatizhe na Mupashi Wazhila ne bulume, pakuuba mba ngikale mwaana wakwa Lesa. Pano, kijitu pamo nobe byo Nakonsha kwenda,

kwamba nobe muntu, kwendesha motoka wami nobe muntu, pano inge Natambula Mupashi Wazhila, Natambula bulume bwakupangamo bademona, kwamba na jimi ipya, kusapwila Mamboawama, kubuka bakolwa. Amiwa nabatizhiwa! Kechi kusemwa ne; bino kubatizhiwa!

Bapwijilenga pa nzubo ya peulu,
Bonse nakulomba mu Jizhina Janji,
Abo babatizhilwe na Mupashi Wazhila,
Kabiji bulume bwakwingila bwaishile.

¹³⁷ Amena. Mwaketekela kuya ku Bumi Bwapeenape, kabiji wasemwa jibiji konka ku lwitabilo lobe. Yesu waambile mba, mu Yoano Wazhila 5:24, “Aye umvwa Byambo Byami ne kumwitabila Aye Watuma, uji na bumi bwa myaka,” kechi Mupashi Wazhila ne, ujitu na bumi bwa myaka. Aye wasemwa mu kisemi kya Lesa. Kabiji ne kubatizhiwa mu Mupashi Wazhila, na bulume bwa maana a lwitabilo, kwitabila Mamboawama ne Kwiabika aingila ne Kwialengela auba ngubilo yaitabilwa. Amena. Pano aye wauba byubilo nobe mwaana wakwa Lesa. Nanchi wakonsha kupangamo ne bademona. Yesu waambile mba, “Abye biyukilo bikebalondela!” Mwamona? “Mu Jizhina Jami bakapangilamo bademona, bakamba na jimi ipya, bakatola miloolo, bakatoma bifwana.” Monai, aye watambula bulume na Mupashi Wazhila, bwa kuuba bibye bintu.

¹³⁸ Pano, Aye byo aile, Waambile mba, “Kimuwamina Amiwa Nafumapo. Mambo, inge Nabula kuya, Mupashi Wazhila kechi ukeya ne.” Mwamona? Kabiji Aye byo akeya, Ukebashiina ba panopantanda na mambo a bundengamambo, kabiji ne kufunjisha bololoke, ne kwimumweshwa bintu bikeya (abyo ke bimwesho). “Aye ukasenda bintu byo Nemufunjisha anweba, kabiji ne kwibisolola kwi anweba.” Byonka Byambo Aye byo akeya...Kafwako muntu wakonsha kukwatakanya Kyambo pangye ya lubatizhilo lwa Mupashi Wazhila. Kabiji umvwe muntu waamba mba uji na lubatizhilo lwa Mupashi Wazhila, kabiji wapachika Kyambo kiji bulongo, pajipo kintu kimo kyatama.

¹³⁹ Paulo wajinga kajimbulushi wa Lulayang’ano Lupya. Kechi byo kyajinga ne, Lulayang’ano Lupya kechi wanembelwe ne. Paulo wajinga kajimbulushi ja Bwinakilishitu, Saulo. Kabiji byo atambwile Mupashi Wazhila, waile pa myaka isatu ku Asia na kufunda Binembelo, mambo aye wafunjishiwe kwi Gamaliela, mufunjishi mukatampe. Pano byo abwelele, kabiji myaka fotiini palutwe, aye waile na kukumanya Petelo ku Yelusalema, kabiji bataine kuuba mba bajinga Kyambo pa Kyambo Mamboawama amotu. Awa yeka Lesa umo wajinga ne Petelo byo asapwijile pa juba ja Pentekositi ne kwibabuula mba balapila ne kubatizhiwa mu Jizhina ja Yesu Kilishitu, awa yeka Mupashi Wazhila umotu wikisolwele kwi Paulo, kabiji wibabuujile mu Byubilo 19 panyuma ya kubatizhiwa kimye kimo kwi Yoano, waambile

mba, “Anweba mwafwainwa kubatizhiwa jibiji, mu Jizhina ja Yesu Kilishitu.” Mwamona?

¹⁴⁰ Monai, Mupashi Wazhila wikala waoloka na Binembelo. Ke lwitabilo mu Kyokyo kyo kishikula kyonse kyafyamika. Amena. Aye Baibolo waamba mba, mu Yoano Mutanshi 5:7, “Kuji basatu bapana lushimuno, Mwiulu: Taata, Kyambo (ao wajinga Kilishitu), kabiji ne Mupashi Wazhila. Abo basatu ke Umo.” “Kabiji kuji bisatu bipana lushimuno pantanda: meema, Mashi, Mupashi. Abye bisatu kechi kimo ne, bino bitabazhanya mu bu umo.” Pano, obewa kuuba waikala na Taata kwakubula kwikala na Mwaana ne, kuuba waikala na Mwaana kwakubula kwikala na Mupashi Wazhila ne; Abo ke Umo. Bino wakonsha kubingishiwa kwakubula kutokeshiwa, kabiji wakonsha kwikala watokeshiwa kwakubula Mupashi Wazhila ne. Kutokeshiwa ke kupichila mu Mashi, kupichila mu Mashi kileta Bumi. Mwamona? Kabiji Mupashi Wazhila ke bulume bwakwa Lesa, monai, bulume bwapewa ku Kipwilo.

¹⁴¹ “Anweba mukatambula” (ka?) “bulume,” Byubilo 1:8, “panyuma ya yuwe Mupashi Wazhila waiya pe anweba. Anweba mukatambula bulume!” (Kechi mba “mukasemwa jibiji ne.”) “Anweba mukatambula bulume Mupashi Wazhila byo akeya pe anweba. Nanchi anweba mwi bakamonyi Bami mu Yelusalema, Yudeya, ne mu Samaliya, kufika ne kwapela ntanda.” Mwamona? Mutambula bulume panyuma ya kutambula Mupashi Wazhila. Bino patanshi wafwainwa kutambula Mupashi Wazhila, kabiji abwa ke bulume bwa Lesa, monai, mu kusolola ne kumwesa. Obewa wi—obewa wi...nobe muntu, kabiji wafunjile kwamba ne kwenda ne kuuba bintu byubapo bantu; umvwe wabatizhiwa na Mupashi Wazhila, anweba mwapewa bulume bwakwingila nobe baana babalume ne babakazhi bakwa Lesa. Kechi kyakukumya ne bantu bamwesa ne kuuba bintu byo booba leelo, abo kechi bayuzhiwa na Mupashi Wazhila ne. Inge bakonsha, bakonsha kuuba kyapusanako. Baamba mba baji nanji, bino Yesu waambile mba, “Konka ku bipangwa byabo ko mukebayukila.” Pano mwakonsha kwikyuba byepi, mwamona, byonse byalubakanatu. Mwamona? Bino bwelai ku bukine!

¹⁴² Pano, inge waikala waoloka ne kwamba obewa mwine mba ne Mwinakilishitu, twakwita bufuku buno ku tebulu wa Nkambo. Leelo, kwakubula ne kuzhinauko, kijilo kijiwa mu kyaalo kyonse, bamo mu jishinda jimo kabiji bakwabo mu jikwabo. Bino Nalanguluka mba jishinda jawama ja kwikyubilamo ke kulondela Binembelo, monka mo baubijile mu Binembelo. Naketekela akyo kyafwainwa kwikala kyawaina.

¹⁴³ Bushe unji na Baibolo obe, Mulongo Neville? Mulongo Neville pano usakutanga Binembelo.

[Mulongo Neville waamba mba, “Mu kyapitala kyabu 11 kya Kolinda Mutanshi, kutatwila pa veeleshi wabu 23:”—Waku.]

[*Mambo Natambwile kwi Nkambo akya kyonka kyo Nemufikizhizhe anweba, Namba Nkambo Yesu mu bonkabwa bufuku bo bamusolwele washikwile shinkwa:.*]

[*Ne pa kusanta, wamutebwile, ne kwamba mba, Tolai, muje; uno ye mubiji wami, wimutebaukila anweba: mukobenga kiky mu kumvuluka amiwa.*]

[*Kabiji byonkabyo ne katomeno nako pamo, byo atopelepo, ne kwamba mba, Kano katomeno ye mulaye mupya wa mu mashi ami: mukobenga kiky, bimye byonse byo mukatomanga mu kamvulukenga amiwa.*]

[*Mambo bimye byonse byo mukajanga uno shinkwa, ne kutoma kano katomeno, mukasapwilanga lufu lwa Nkambo poso waiya.*]

[*Na onka ano mambo awa uja uno shinkwa, nanga kutoma ku katomeno ka Nkambo, kyabula kufwainwa, ukazhatwa nao a mubiji ne a mashi a Nkambo.*]

[*Bino lekai muntu akieseke mwine, bino aje ku uno shinkwa ne kutoma ku kano katomeno.*]

[*Mambo awa uja ne kutoma mwabula kufwainwa, wijiila ne kwitomena mwine luzhachisho, umvwe ne kumona mubiji wa Nkambo ne.*]

[*Na onka ano mambo bavula ba mwi anweba bakokelela ne kukolwa, ne bavula bafwa kala.*]

[*Mambo inge twipima atweba bene, kechi tukazhatwe ne.*]

[*Pakuuba umvwe twazhatwa, twafundwa kwi Nkambo, amba kechi tukazhatwe pamo na ba panopantanda ne.*]

[“Aye Nkambo apeshe kutanga kwa Kyambo Kyanji.”]

¹⁴⁴ Kimye kyonse ke kintu kyazhila bingi, ke kintu kyazhila, Naketekela mba twafwainwa kukunyika mitwe yetu mu milombelo ya kuzhidama. Anweba mundombeshopo, Amiwa ne mulombeleleko. Twayai tulombelele umo ne mukwabo, amba Lesa etubile lusa bilengwa byabula kufikilamo abyo biji pepi nakutolako lubaji ku kiky kyazhila kikatampe mu kumvuluka lufu lwa Nkambo.

¹⁴⁵ [Mulongo Branham waleka kwamba ke kulombela mumuchima. Kafwapo bijipo pa tepu ne—Waku.] Awe mulombelo wa kwisolola yetupana kwi Anweba, Taata wetu, pa kyakusokelapo bitapisho Kyenu kya golonde, na Kitapisho kyetu, aye Nkambo Yesu. Twikipuzha mu Jizhina Janji. Amena.

¹⁴⁶ Pano Naketekela mba bakulumpe basakusenda kifulo kyabo, kabiji bakonsha...kya kipwilo, kabiji basakuletanga bantu byo basakwiyanga, mulaini pa mulaini, kwiya ku kijilo. Kimye kyonse ndangulukatu pa yewa lwimbo:

Mutemwe Mwanamukoko ubena kufwa, Mashi
 Obe awama
 Kechi akataya bulume bwao ne,
 Poso kyonse Kipwilo kya Lesa kya
 Kyapuluka, kubula kulenga mambo jibiji.

Twayai tukunyike mitwe yetu.

¹⁴⁷ Walusa Taata Wazhila, Yehoba, mukatampe Wabulume bonse, tumai mapesho Enu pa bantu Benu byo tubena kupembelela. Tulekelaiko mambo etu. Kabiji twapana kwi Anweba abye byazhila, awe waini, magelepu ajimwa, kabiji ne maboko a bamwingilo avingawijile bibye pamo. Kabiji byalengwa mu waini oene mambo otwibiletela kwi Anweba, pakuuba mba emeneko kwi atweba Mashi a Nkambo yetu Yesu Kilishitu. Ne mulomba Anweba, Taata, muzhijike waini na mambo akyokyo. Tulekelaiko bubi bwetu bonse. Kabiji lekai muntu yense wakutambula yuwe waini mu mubiji wabo, lekai bekale na bumi bwawama, bulume, ne lupulukilo kufuma kwi Anweba. Kiswishai kye, Nkambo. Twikipuzha mu Jizhina ja Yesu. Amena.


¹⁴⁸ Aye Baibolo waamba mba byo Atebawile shinkwa ne kumupesha, waambile mba, "Tolai muje, uno ye Mubiji Wami wimutebukila anweba. Akye mukeyubenga mu kumvuluka Amiwa." Kabiji umvwe twatola atwe tupimvwa twa shinkwa, twasokwa, twalengwa kwakubula mbizho, twalengwa na Benakilishitu, twaalengwa mambo akuuba mba—mba kyaimenako Mubiji wa Kilishitu. Twayuka mba—mba kyajinga baana babwanga ba mu moba kwa Kilishitu, nangwa mu juba ja kipwilo, abo batolele bibye bibese ne kungezha kajo ka mulajilo ka pa kijilo kya mulajilo kyapeleko, pa kijilo kyapeleko kya Kilishitu. Kabiji monse mu Baibolo, kyajinga banababwanga baingilanga bibye bintu ku bantu. Kabiji buleelo, banababwanga ba-bukatataka, balongo betu muno mu kipwilo, banababwanga ba luno Lwendo, bengijila bantu. kabiji basakusenda bibye bipimvwa ne kupana ku bantu.

¹⁴⁹ Kabiji pano umvwe mwatambula yuwe shinkwa, vulukai, kyaimenako Mwanamukoko. Myaka yakala mwanamukoko wa Isalela byo bamukangile pa mujilo, ne ku muja na mabula alula, bantu bajinga na bulume; makwabilo abo kechi afwile ne, bimvwalu byabo kechi bya tabaukile ne, mu lwendo lwabo lonse poso byo bafikile muntanda ya mulaye. Lekai Lesa etulame na bumi bwawama, bwalusekelo, na kumwingijila Aye poso twafika ku Ntanda Yamulaye ayo Yo etupa.

Twayai tulombe.

¹⁵⁰ Taata Walusa Wamwiulu, byo Mbeni kwamba bufuku buno pa yuwe Wazhila, Mubiji watokeshiwa wa Nkambo yetu, mwi Aye mo mwaikala kuyula konse kwa Bulesa, inge Nalanguluka pa yuwe Mubiji ye ba mfupawile ne—ne kutebaulwa, kabiji Mashi wasuminenga, nyuma Yanji ne mbavu Yanji byabembelijenga, bikozha mu nyuma Yanji, inge Nalanguluka pa yuwe wankankachila, shinkwa ye batwa waimenako kyokyo, kiya jibiji bukatataka mu michima yetu, twatula michima yetu, Nkambo, pa kitapisho Kyenu bufuku buno. Tulekelaiko mambo, Anweba Lesa. Kabiji lekai yuwe shinkwa watebaulwa, byo asakuyanga mu kanwa ka baabo, bakalume Benu, kabiji lekai bayuke mba wajinga Mubiji Wenu aao wafupilwe ne kukozhiwa, kabiji konka ku bipumo byenu ko twabukilwa. Kiswishai kye, Nkambo. Zhijikai yuwe shinkwa pakuuba mba engile mwingilo wanji. Twaipuzha mu Jizhina ja Yesu. Amena.

Ngikwataitu pa mineti umo.

¹⁵¹ Kechi kijilo kyanshikwa ne. Yense waitabila Mwinakilishitu waitwa ku tebulu wa Nkambo, kwikala nalulwe lumvwanag'ano lwa bupopweshi pamo ne atweba...?... 

62-1007 Kii Wa Ku Kibelo
Branham Tabernacle
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org